

豫 宋 黃 軒

黃
平
功
德
記

古
任



陝
西
人



黄帝功德纪

于 右 任



陕西人民出版社



序

黄帝公孙轩辕氏，实吾中华民族之元祖。吾中华民族有此生息昌大之疆土，有此博大悠久之文化，有此四千年余震撼世界之历史，翳维黄帝，为国族之神。

于史，黄帝既战胜蚩尤，东至于海，西登昆仑，南及交趾，北出幽陵，而开拓中华民族已有之疆土。其子孙之蔓延于各地也，如汉族固为其苗裔，而西藏族之羌，回族之安息，苗黎族之禹号，蒙古族之匈奴，东胡族之鲜卑。金人之祖且为黄帝之子清，满清则金人之后也，是皆近世治史者所能考信。是中华民族之全体，均皆黄帝之子孙也。

皇古荒昧，孰启鸿蒙？生活文物，孰为大备？黄帝不惟为中华民族之始祖，抑又为中国文化之创造者也。其发明制作，除人民衣食住行日常资用者外，尤要者如文字、算术、历数、医药、音乐等，皆万世之资，而一时已备。至于指南之针，辨方定位，迄今为世界交通所大赖。然此犹事功之彰著者言耳。更如至德要道，典籍

恒垂，后世玄言，动皆称述。是此精神文教之施，亦万世万类矣。

我中华民族有如此之伟大，中国文明有如此之超远，实黄帝拓殖创造之功也。兹我民族奋图复兴，思继我远祖之皇烈，国于近世，岂有以四百兆庶众子孙，凭席威灵，而无以遂其国之自由平等？桥山之弓剑可攀！千里万里，千叩万叩，其共誓于我元祖之陵。

于国之初，于岁之春，中央政府倡率民族扫墓，将有事于桥陵，礼也。斯为天下所未尝有，抑为天下所不可能。追维作始，发扬踔厉，不可不有功德之纪。余昔由陕北而南，赴关中主革命军事，过中部县*曾谒于陵下。兹因动念，约友人将黄帝功德之见于载籍者，撮要录次，即名为《黄帝功德纪》。凡书所有，类多列之。由是以为征考断定，则史家之职也。夫祖德之述，在美盛德之形容。吾民族既有此疆土文物历史矣，其道大光，责无旁贷，重践吾民族东来之路。兹献一编，愿念兹在兹名言兹在兹也。

中华民国二十四年三月 于右任 谨序于南京

* 中部县即今陕西省黄陵县。

目 录

序

黄帝之世家·····	(1)
黄帝与中华民族·····	(10)
黄帝与中国文化·····	(28)
黄帝之政绩·····	(41)
黄帝之仙化与陵墓·····	(51)

附

黄帝本纪·····	(83)
中部县八景·····	(85)
说明·····	(86)





黄 帝 之 家 世

一、父 母

《国语·晋语》：“昔少典娶于有蟠氏，生黄帝。”

《史记·五帝本纪》：“黄帝者，少典之子，姓公孙，名曰轩辕。生而神灵，弱而能言，幼而徇齐，长而敦敏，成而聪明。”

《帝王世纪》：“黄帝，少典之子，姬姓也。母曰附宝，见大电绕北斗枢星，照郊野，感附宝，孕二十四月，生黄帝于寿丘，长于姬水，有圣德，受国于有熊，居轩辕之丘，故因以为名，又以为号。”

《河图握拒》：“黄帝，名轩，北斗黄精神，胸文曰黄帝子。”

《拾遗记》：“轩辕出自有熊之国，母曰昊枢，以戊己之日生，故以土德王也。时有黄星之祥。”

《通鉴外记》：“黄帝，有熊国君少典之子，姓公孙，名轩辕，生于寿丘，长于姬水，改姓姬。”

《轩辕黄帝传》：“轩辕黄帝，姓公孙，有熊国君少典之次子也。其母西桥氏女，名附宝，暝见大电光绕北斗枢星，照于郊野。附宝感之而有娠，以枢星降，又名天枢。怀二十四月，生轩辕于寿丘。帝生而神灵，幼而徇齐，弱而能言，长而敦敏，成而聪明，龙颜日角，河目隆颡，苍色大肩，始学于项，长于姬水。”

《路史·疏仡纪·黄帝》：“黄帝有熊氏，姓公孙，名荼，一曰轩。轩之字曰玄律。少典氏之子，黄精之君也。母吴枢曰符葆，秘电绕斗轩而震，二十有四月而生帝于寿丘，故名曰轩。生而紫气充房，身逾九尺，附函挺朵，修髯花瘤，河目隆颡，日角龙颜。生而神灵，髻（编者按：疑为“弱”字）而能言，幼慧齐，长敦敏，知幽明生死之故。少典氏没，后轩嗣立，成为姬姓，并谋兼智，明法天明，以使民心一，四国顺之，于是开国于熊。”

《陕西通志·帝系》（雍正本）：“有熊氏，少典氏之子，王承填而土行，色尚黄，天下号之黄帝。身五十二战，而天下大服。乃达四面，广能贤，稽功务法，秉数乘刚，而都于陈、今宝鸡故陈仓。姚睦云：‘黄帝都陈仓，非宛丘。’故今陇右，黄帝遗迹甚多。”

二、妃 嫔

《史记·五帝本纪》：“黄帝……娶于西陵之女，

是为嫫祖。嫫祖为黄帝正妃。”

《帝王世纪》：“元妃，西陵氏女，曰嫫祖，生昌意。次妃，方雷氏女，曰女节，生青阳。次妃，彤鱼氏女，生夷鼓，一名苍林。次妃，嫫母，班在三人之下。”

《汉书·古今人表》：“彤鱼氏生夷鼓，嫫母生苍林。”

《图书集成》第五四六卷：“中部县轩辕帝后祠，在城北五十里回军山上。传帝北巡，携四妃至此，土人立祠以祀之。”

《路史·疏仡纪·黄帝》：“元妃西陵氏，曰嫫祖。……次妃方繄氏，曰节。……次妃彤鱼氏。……次妃嫫母，貌恶德克，帝纳之曰：‘属女德而弗忘，与女正而弗襄，虽恶何伤！’”

《吕氏春秋》：“人之于色也，无不知悦美者，而美者未必遇也。故嫫母执于黄帝，黄帝曰：‘属女德而弗忘，与女正而弗襄，虽恶何伤！’”

《列女传》：“黄帝妃嫫母，于四妃之班居下，甚丑而最贤，心每自退。”

《轩辕黄帝传》：“帝娶西陵氏，曰嫫祖，为元妃。……少昊，黄帝之小子也，帝妃女节所生。……帝又纳丑女号嫫母。……又纳费修氏为夫人。……纪、钟、甄、声，帝之四妃也。”

《玉房秘诀》：“彭祖曰：‘黄帝御千二百女而登

仙。’”

三、子 孙

《国语·晋语》：“黄帝之子二十五人，其同姓者二人而已。唯青阳与夷鼓为己姓。青阳，方雷氏之甥也。夷鼓，彤鱼氏之甥也。其同生而异姓者，四母之子，别为十二姓。凡黄帝之子二十五宗，其得姓者十四人，为十二姓：姬、酉、祁、己、滕、藏、任、苟、僖、媯、偃、依是也。唯青阳与苍林氏同于黄帝，故皆为姬姓。”

《史记·五帝本纪》：“黄帝二十五子，其得姓者十四人。……嫫祖为黄帝正妃，生二子，其后皆有天下。其一曰玄囂，是为青阳，青阳降居江水。其二曰昌意，降居若水。昌意娶蜀山氏女，曰昌仆，生高阳。”

《黄帝龙首经序》：“黄帝将上天，次召其三子而告之曰：‘吾昔受此龙首经于玄女。’……三子拜受而起，龙忽腾翥。三子仰瞻，尚见龙头矣，遂以名其经曰《龙首》云。”

《黄帝金匱玉衡经》：“黄帝曰：‘吾授汝此图《金匱玉衡经》，二子秘之。苟非其人，道不虚行。’”

《轩辕黄帝传》：“帝娶西陵氏于大梁，曰嫫祖，为元妃，生二子：玄囂、昌意……。帝又纳丑女，号嫫母，使训人而有淑德，奏六德之颂。又纳费修氏为夫人。

……纪、钟、甄、声，帝之四妃，生二十五子，得姓者十二人：姬、酉、祈、己、滕、葳、任、苟、僖、诘、旋、依。黄帝九子，各封一国。元妃嫫祖生二子玄嚣、昌意，并不居帝位。玄嚣得道为北方水神，昌意居弱水。弟少昊，黄帝之小子也，帝妃女节所生，号金天氏，后居帝位。黄帝之女溺于东海，化为鸟，名精卫，常衔西山木石以堙东海。昌意娶蜀山氏之女生颡顼，居帝位号高阳氏，黄帝之嫡孙也。黄公拓跋，昌意之少子也，封北土。禹强，黄帝之胤，不居帝位，亦得道居北方，为水神。少昊有子七人，颡顼以其一子有德业，赐姓曼氏，余不闻。……帝之子少昊，名摯，字青阳，号金天氏，居位八十一年，都曲阜。子孙相承，共四百年。黄帝之孙颡顼，号高阳氏，母蜀山氏所生，有圣德，居帝位七十八年，都商丘。帝誉高辛氏，黄帝之曾孙也。帝誉生而神灵，自言其名，居帝位七十年，寿一百五岁，都偃师。帝尧陶唐氏，黄帝之玄孙，帝誉之子也，姓伊祁，字放勋，兴于定陶，以唐侯为帝，在位七十年，寿一百一十八岁，都平阳。舜有虞氏，黄帝九代孙，姓申屠，摄帝位三十年整，居位五十年，寿一百一十二岁，都蒲坂。夏禹，亦黄帝之玄孙也，姓姁，居帝位，都安邑，在位九年，子孙相承，共四百三十二年。……殷汤，黄帝十七代孙，姓子，都亳，在位一十三年，子孙相承共六百二十三年。周发，黄帝一十九代孙，姓姬，居帝位六年，都镐京，后平王迁洛邑，子孙相承共八百

七十三年。黄帝子孙各得姓于事，帝推律定姓者十二，九子各封一国。总三十三氏，出黄帝后。《先天纪》云：‘子孙相承，凡一千五百二十年。’”

《路史·疏仡纪·黄帝》：黄帝“……子二十五，别姓者十二，析、酉、滕、藏、任、苟、釐、结、偃、依，及二纪也，余循姬姓。元妃西陵氏，曰嫫祖，生昌意、玄囂、龙苗。昌意就德，逊居若水，有子三人，长曰乾荒，次安，季惓。乾荒生帝颡项，是为高阳氏。安处西土，后曰安息，汉来复者为安氏延李氏。惓迁北土，后为党项之辟，为拓跋氏。至郁律二子，长沙莫雄，次什翼犍，初王于代，七子。其七窟咄生魏帝道武，始都洛为元氏。十五世百六十有一年，周齐灭之。有党氏、奚氏、达奚氏、乞伏氏、乞骨氏、什氏、乾氏、乌氏、源氏、贺拔氏、拔拔氏、万俟氏、乙旌氏、秃发氏、周氏、长孙氏、车非氏、兀氏、郭氏、俟亥氏、车焜氏、普氏、李氏，八氏十姓，俱其出也。拓跋思敬镇夏，以讨巢功，赐李姓。有拓跋仁福者，为番部都指挥使，亦从其姓，将吏迎为州师。子彝超、彝兴，继有夏、银、绥、宥地。玄囂姬姓，降居泝水，生帝誉，是为高辛氏。龙苗生吾融，为吾氏。吾融生卞明，封于卞，为卞氏。卞明弃其守降之。南裔生白犬，是为蛮人之祖。帝之南游，西陵氏殁于道，式祀于行，以其始蚕，故又祀先蚕。次妃方囂氏曰节，生休及清。休继黄帝者也，是为帝鸿氏。清次封。清为纪姓，是生小昊。次妃彤鱼氏，

生挥及夷彭。挥次十五王造弧矢，及司率罟，受封于张，为弓氏、张氏、李氏、灌氏、叱罗氏、东方氏。夷彭，纪姓，其子始封于采，是为左人，有采氏、左人氏、夷鼓氏。次妃嫫母，貌恶德克，帝纳之曰：‘属女德而弗忘，与女正而弗襄，虽恶何伤！’是生苍林、禺阳。禺阳最少，受封于任，为任姓。谢、章、舒、洛、昌、契、终、泉、卑、禺，皆任分也，后各以国令氏。禺号生禺京、傜梁、儋人。京居北海，号处南海，是为海司，有禺强氏、强氏。儋人，任姓，生牛黎。傜梁生番禺，番禺是始为舟。(番禺)生奚仲，奚仲生吉光，是主为车，建侯于薛。又十二世仲虺，为汤左相，始分任。祖己七世成迁为摯，有女归周，是诞文王。逮武为世，复薛侯，后灭于楚，为薛氏、蘧氏、且氏、祖氏、奚氏、嵇氏、仲氏、摯氏、执氏、畴氏、伾氏、丕氏、邳氏、姪氏、婿氏、李氏、徐氏。终古，夏太史乘乱归商，为佟氏、谢氏。谢之后又有射氏、大野氏。苍林，姬姓，生始均，是居北狄为始氏。结姓伯儻，封于南燕，后有吉氏、媯氏、孔氏。密须、阇、允、蔡、光敦、偃、燕、鲁、雍、断、密、虽，皆结分也。箴、济及滑，箴姓分也，后合以国令氏。有虞氏作，封帝之后，一十有九侯伯，其得资者为资氏、郟氏，得郟者为郟氏、辅氏，得虔者为虔氏，得寇者为寇氏、口引氏、刘氏。国于酈者为酈氏、伋氏，食其氏，侍其氏。国于翟者为翟氏、緄氏、狄氏，于詹者为詹氏。自詹移葛，则为葛氏、詹葛氏。髡氏依之分，狂犬

任之种也。后武王克商，求封帝之裔于蓊，以复契，又有蓊氏、桥氏、乔氏、陈氏、苍林氏、有熊氏、轩氏、轩辕氏、陈氏。洛之后又有落氏、雒氏。阨之后又有监氏。密须之后又有须氏。舒之后又有舒子氏、纪氏。”

《本行记》：“黄帝居代总一百一十年，在位一百年。……黄帝之子昌意居弱水。昌意之弟少昊，帝妃女节所生也。帝之女溺于东海，化为鸟，名曰精卫，常衔西山木石以堙东海焉。少昊名摯，字青阳，即帝位号金天氏，黄帝之子也。颛顼高阳氏，黄帝之孙也，有圣德，在位七十八年，年九十八岁，母蜀山氏，都商丘濮阳。禹强，黄帝之胤，颛顼之子，与颛顼俱得道。颛顼为玄冥，禹强为北方水神。帝啻高辛氏，黄帝之孙。帝生而神灵，自言其名，都偃师，在位七十年，年一百五十岁。帝尧陶唐氏，黄帝玄孙，姓伊祁，名放勋，兴于定陶，以唐侯为帝，都于平阳，在位九十八年，年一百一十八岁。帝舜有虞氏，姓姚，名重华，黄帝八代孙，都蒲坂，年百岁，得道登遐于九疑之山。夏禹号夏后氏，黄帝玄孙，姓姁，名文命。殷汤，黄帝十七代孙。黄帝子孙各得姓于事，帝吹律定姓者十二。少昊有子姓曼，颛顼姓姬，尧姓伊祁，舜姓姚，禹姓姁，汤姓子。”

《山海经》：“黄帝生禹虢，禹虢生禹京。禹京处北海，禹虢处东海，是为海神。”“帝俊生禹号，禹号生淫梁，淫梁生禹番，是始为舟。禹番生奚仲，奚仲生吉

光，吉光是始以木为车”。 “有儋耳之国任姓”， “禹号子食谷”。 “有牛黎之国，有人无骨，儋耳之子”。

“有无继民……任姓。无骨子食气鱼”。 又 “有无肠之国，是任姓。无继子食鱼”。 “黄帝生苗龙，苗龙生融吾，融吾生弄明，弄明生白犬。白犬有牝牡，是为犬戎，肉食。有赤兽，马状，无首，名曰戎宣王尸”。

“有北狄之国。黄帝之孙曰始均，始均生北狄”。

《春秋命历序》：“黄帝传十世，一千五百二十岁。”

黄帝与中华民族

一、战争

《左传》僖二十五年：“遇黄帝战于阪泉之兆”。

《周书》：“昔天之初，□作二后，乃设建典命。赤帝分正二卿，命蚩尤于宇，少昊以临四方，司□□上天，莫成之庆。蚩尤乃逐帝，争于涿鹿之阿，九隔无遗。赤帝大慑，乃说于黄帝，执蚩尤杀之于中冀，以甲兵释怒。用大正顺天，思序纪于大帝，用名之曰绝讐之野。乃命少昊请司马鸟师以正五帝之官，故曰质天用大成，至今不乱。”

《史记·五帝本纪》：“轩辕之时，神农氏世衰。诸侯相侵伐，暴虐百姓，而神农氏弗能征。于是轩辕乃习用干戈，以征不享，诸侯咸来宾从，而蚩尤最为暴，莫能伐。炎帝欲侵陵诸侯，诸侯咸归轩辕。轩辕乃修德振兵，治五气，艺五种，抚万民，度四方，教熊罴貔貅羆虎，以与炎帝战于阪泉之野。三战，然后得其志。蚩尤

作乱，不用帝命。于是黄帝乃征师诸侯，与蚩尤战于涿鹿之野，遂擒杀蚩尤。而诸侯咸尊轩辕为天子，代神农氏，是为黄帝。天下有不顺者，黄帝从而征之，平者去之。”

《帝王世纪》：“又征诸侯，使力牧、神皇直讨蚩尤氏，擒于涿鹿之野，使应龙杀之于凶黎之丘。凡五十二战，而天下大服。”

《归藏》：“蚩尤出自羊水，八肱，八趾，疏首，登九淖以伐空桑。黄帝杀之于青丘，作《桎古之曲十章，一曰雷震惊，二曰猛虎骇，三曰鸢鸟击，四曰龙媒蹶，五曰灵夔吼，六曰雕鹗争，七曰壮士夺志，八曰熊黑哮吼，九曰石荡崖，十曰波荡壑。”

《龙鱼河图》：“黄帝时，有蚩尤，兄弟八十一人，并兽身人语，铜头铁额，食砂石子，造立兵杖、刀戟、大弩，威震天下，诛杀无道，不仁慈。万民欲令黄帝行天子事，黄帝仁义，不能禁蚩尤。黄帝仰天而叹，天遣玄女授兵信神符，制伏蚩尤，帝因使之主兵以制八方。蚩尤没后，天下复扰乱，黄帝遂画蚩尤形象以威天下。天下咸谓蚩尤不死，八方万邦皆为弭服。”

《玄女兵法》：“蚩尤幻变多方，征风召雨，吹烟喷雾，黄帝师众大迷。帝归息太山之阿，昏然忧寝，王母遣使者被玄狐之裘，以符授帝。佩符既毕，王母乃命九天玄女授帝以三宫五音阴阳之略，太乙遁甲六壬步斗之术。阴符之机灵，实五符五胜之文，遂克蚩尤于中

冀。”

《春秋元命苞》：“蚩尤虎卷，威文立兵。”

《黄帝内传》：“黄帝伐蚩尤，玄女为帝制夔牛鼓八十面，一震五百里，连震三千八百里。玄女为帝制司南车当其前，记里鼓车居其右。”

《山海经》：“东海中有流波山，入海七千里。其上有兽，状如牛，苍身而无角，一足，出入水则必风雨。其光如日月，其声如雷，其名曰夔。黄帝得之，以其皮为鼓，橛以雷兽之骨，声闻五百里，以威天下。”

《古今注》：“黄帝与蚩尤战涿鹿之野，常有五色云气，金枝玉叶于帝上。有花葩之象，故因而作华盖也。”

《山海经》：“蚩尤作兵伐黄帝，黄帝乃令应龙攻之冀州之野。应龙蓄水，蚩尤请风伯雨师纵大风雨，黄帝乃下天女曰魃，雨止，遂杀蚩尤。魃不得复上，所居不雨。叔均言之帝，后置之赤水之北。叔均乃为田祖。魃时亡之所，欲逐之者令曰：‘神北行！’先除水道，决通沟渎”。“应龙处南极，杀蚩尤与兮父，不得复上，故下数旱。旱为应龙之状，乃得大雨。”

《拾遗记》：“昆吾山，其下多赤金，色如火。昔黄帝伐蚩尤，陈兵于此地，掘深百尺，犹未及泉，惟见火光如星，地中多丹，炼石为铜，青色而利。”

《盐铁论》：“轩辕战涿鹿，杀两咩、蚩尤而为帝。”

《通鉴外纪》：“蚩尤最为暴，莫能伐。炎帝欲侵诸侯，诸侯咸归轩辕。轩辕修德振兵，治五气，艺五种，抚万民，度四方，教熊黑貔貅羆虎，与炎帝战于阪泉之野，三战然后得志。蚩尤作乱，不用命，轩辕征师与蚩尤战于涿鹿之野，遂擒蚩尤于中冀，名其地曰绝轡之野。制阵法，设五旗五麾，天下不顺者从而征之。”

《轩辕黄帝传》：“既擒蚩尤，乃迁其庶类，善者于邹屠之乡，其恶者以木械之，杀蚩尤于黎山之丘。”

《史记·五帝本纪》：“北逐荤粥……迁徙往来无常处，以师兵为营卫。”

《国语·晋语》：“昔少典娶于有娇氏，生黄帝、炎帝。黄帝以姬水成，炎帝以姜水成。成而异德，故黄帝为姬，炎帝为姜。二帝用师以相济也，异德之故也。”

《轩辕黄帝传》：“黄帝又与榆罔争天下。榆罔恃神农之后，故争之。黄帝始以雕、鹖、鹰、鹳为旗帜，以熊、黑、羆、虎为前驱，战于阪泉之野，三战而后克之。帝又北逐獯鬻之戎，诸侯有不从之者，帝皆率而征之。凡五十二战，天下大定。”

《黄帝内传》：“黄帝斩蚩尤，蚕神献丝，乃称织维之功。”

《拾遗记》：“轩辕去蚩尤之凶，迁其民善者于邹屠之地，迁恶者于有北之乡。其先以地名族，后分为邹

氏、屠氏。”

《山海经》：“蚩尤所弃其桎梏，是为枫木。”

《皇览》：“蚩尤冢在东平郡寿张县关乡城中，高七尺，民常以十月祀之。有赤气出，如绛帛，民命者为蚩尤旗。”

《路史·疏仡纪·黄帝》：“炎帝氏衰，蚩尤惟始作乱，赫其火弹以逐帝。帝弗能征，乃帅诸侯责于后，爰及风后、力牧、神皇之徒，较其徒旅；以曷小颢而弭火灾，得一奉宸。乃临盛水，录龟符，纳三宫五意之机，受八门九江之要，衍握奇以为式，故五旗、五麾、六毒而制其阵。年三十七，戮蚩尤于中冀。于是炎帝诸侯咸进委命，乃即帝位，都彭城。”

《太白阴经》：“帝征蚩尤，七十一战，不克。昼梦金人引领长头，玄狐之裘，云：‘天帝使授符。得兵符，战必克矣！’帝寤，问风后，曰：‘此天应也。’乃于盛水之阳，筑坛祭太牢。有玄龟含符致坛，似皮非皮，似绋非绋，广三尺，袤一尺，文曰‘天一在前，太乙在后’。帝再拜受，于是设九宫，置八门，布三奇六仪，制阴阳二遁，凡千八十局，名曰天一遁甲式。三门发，五将具，征蚩尤而斩之。”

二、游历及外人来贡

《史记·五帝本纪》：黄帝“东至于海，登丸山，

及岱宗。西至于空桐，登鸡头。南至于江，登熊、湘。北逐荤粥，合符釜山……”。

《新书》：“黄帝曰：道若川谷之水，其出无已，其行无止，故服人而不为仇，分人而不蹲者，其惟道矣。故播之于天下而不忘者，其惟道矣。是以道高比于天，道明比于日，道安比于山，故言之者见谓智，学之者见谓贤，守之者见谓信，乐之者见谓仁，行之者见为圣人。故惟道不可窃也，不可以虚为也。故黄帝职道义，经天地，纪人伦，序万物，以信与仁为天下先，然后济东海入江内，取绿图西济积石，涉流沙登于昆仑，于是还归中国，以平天下。天下太平，唯躬道而已。”

《抱朴子》：“黄帝东到青丘，过风山见紫府先生，受三皇内文，以劾召万神；南到圆、陇荫、建木，观百谷之所登，采若乾之华，饮丹轡之水；西见中黄子受九如之方，过洞庭，从广成子受自然之经；北到洪堤，上具茨，见大隗君黄盖童子，授神芝图，还陟王屋得神丹金诀；到峨嵋山，见天皇真人于玉堂。黄帝生而能言，役使百灵，可谓天授自然之体者也；犹不能端坐而得道，故陟王屋而受丹经，到鼎湖而飞流珠，登崆峒而问广成，之具茨而事大隗，适东岱而奉中黄，入金谷而资滑子，论导养而质玄素二女，精推步则访山稽、力牧，讲占候则询风后，著体诊则受岐雷，审攻战则纳五音之策，穷神奸则记白泽之辞，相地理则书青鸟之说，救伤殄则缀金冶之术；故能毕该秘要，穷道尽真，遂乘

龙以高跻，与天地乎罔极也。”

《轩辕本纪》：“帝登恒山于海滨，得白泽神兽能言，通于万物之情，因问天下鬼神之事，令写为图，作视邪之文以视之。”

《宋符瑞志》：“黄帝时巡狩至于东海滨，泽兽出能言，达知万物之情，以戒于民，为时除害。贤君明德，幽远则来。”

《春秋合诚图》：“黄帝游于玄扈、洛水上，与大司马容光等临观，凤凰衔图置帝前，帝再拜受图。”

《拾遗记》：“帝使风后负书，常伯荷剑，旦游洹流，夕归阴浦，行万里而一息。”

《庄子》：“北门成问于黄帝曰：帝张《咸池》之乐，于洞庭之野？”

《尚书中候》：“黄帝巡洛，龟书赤文，成字象轩。”

《庄子》：黄帝“闻广成子在于空同之上，故往见之”。

《泰壹杂子》：“黄帝谒峨嵋，见天真皇人拜之。”

《路史·疏仡纪·黄帝》：“十有五年，帝喜天下之戴己，乃养正命，娱耳目，昏然，五情爽惑。于是放万机，舍宫寝，而肆志于昆仑。方明执舆，昌寓参乘，张若、谏朋前马，昆阭、滑稽后车，风后、柏常从负书剑。发轳紫宫之中，涉洹沙而届阴浦，陟王屋而受丹

经，登空桐而问广成，封东山而奉中华君，策大面而礼宁生，入金谷而咨涓子心，访大恢于具茨，即神牧于相成，升鸿堤受神芝于黄盖，遂盍群神大明之虚，而投玉策于钟阴。”

《易林》：“黄帝出游，驾龙乘风，东上太山，南游齐鲁，邦国咸喜。”

《符子》：“黄帝将适昆虞之丘，中路逢容成子，乘翠华之盖，建日月之旗，骖紫虬，御双鸟。黄帝命方明、游路谓容成子曰：‘吾将钓于一壑，栖于一丘。’”

《路史·疏仡纪·黄帝》：“乃抚万灵，度四方，乘龙而四巡。东薄海，禅凡山；西逾陇，款笄屯；南入江内，涉熊、湘；北届淳碣，南临玄扈。乃开东苑，被中宫，诏群神授见者，齐心服形以先焉。作清角乐，大合而乐之，鸣鹤翱翔，凤凰蔽日，于是合符于釜山，以观其会。”

《穆天子传》：“辛酉，天子升于昆仑之丘，以观黄帝之宫。”

《庄子》：“黄帝游乎赤水之北，登乎昆仑之丘而南望。还归，遗其玄珠。使知索之而不得，使离朱索之而不得，使喫诟索之而不得。乃使象罔，象罔得之。黄帝曰：‘异哉！象罔乃可以得之乎？’”

《吕氏春秋》：“昔黄帝令伶伦作为律。伶伦自大夏之西，乃之阮隃之阴”。

《黄帝内经》：“帝既与王母会于王屋。”

《列子》：“黄帝昼寝，而梦游于华胥氏之国。华胥氏之国，在弇州之西，台州之北，不知斯齐国几千万里，盖非舟车足力之所及，神游而已。”

《山海经》：“轩辕之国……不寿者乃八百岁。在女子国北，人面蛇身，尾交首上。”

《淮南子》：“黄帝治天下……诸北、儋耳之国，莫不献其贡职。”

《尸子》：“四邦之民，有贯匈者，有深目者，有长肱者，黄帝之德尝致之。”

《宋符瑞志》：“黄帝时，南夷乘白鹿来献鬯。”

《轩辕黄帝传》：“帝所理天下，南及交趾，北至幽陵，西至流沙，东及蟠木。”

三、子孙散布

黄帝子孙所封之国，据《路史·国名纪》所载，共七十国，兹列于（左）：

少典

有熊 “帝之开国，今郑之新郑。《舆地广记》云：‘古有熊国，黄帝所都。’”在今河南。

寿丘 “在兖之曲阜东北六里，高三丈，今仙源。

（《广记》云黄帝所生之地，此本《史记·索隐》。皇甫谧说在鲁东门外。）”在今山东。

陈 “今凤翔宝鸡故陈仓有陈山，非宛邱。”在今陕西。

昌 “昌意后”。

若水 “昌意国，今越嶲之台。《登盟会图》疏以为都，故《世本》云‘允姓国，昌意降居为侯’，非也。”在今四川。

安息 “安之后”。

党项 “邈之后”。

江水 “玄鬻国，若之下流泝水也。今蜀州。”在今四川。

卞 “卞明国，汤代有卞随……今泗水县有卞故城，汉属鲁国。”在今山东。

蛮人 “龙亩之裔，今湖南北、桂林等处皆是，辰、澧、沅、湘之间尤盛。”在今湖南、广西等处。

清 “少昊父封。”在今山东。

张 “挥之封。然黄帝臣，自有张若。故河东解有张阳城，汉之东张，今邢之任县是。（《通典》云：‘汉张县地。’）《纪年》：‘齐师逐郑太子齿奔城张阳。’南郑是也。”在今山西、河南、河北等地。

采 “纪姓，夷彭子，故左人地，今中山之北平。”今在河北。

北狄 “始均之裔。”在今蒙古。

资 “《陈留风俗传》云：‘资姓，黄帝后。’《姓纂》云：‘益州资中，今资州。资阳有资川江。’然古资阳

城在简之阳安（祁之无极有资河，卫之北纠山），而潭之益阳有资水（出县北流入资口，即益水。酈云：即资水之殊口。武冈又有资水出唐。）或其派裔。”在今四川。

酈 “《潜夫论》：‘詹、资、酈、翟，黄帝后。’故《玉篇》云‘资、酈故国，黄帝后，封在岐山之阳，所谓‘周原肫肫’者。顾伯邳云：‘昌意后，止于夏商间。’”在今陕西。

虔 “《风俗通》：‘虔氏出黄帝。’与《陈留传》同。今河东闻喜、虔聚是。”在今山西。

寇 “在郑有寇水，北行唐。今莫之任丘西一里，有寇水枯涸。《陈留传》：‘寇氏自黄帝出。’”在今河南。

酈 “故南阳。酈音尺。今内乡菊潭镇也。”在今河南。

翟 “北地古翟国，后徙西河。《盟会图》云：‘今慈州。’（《地道记》：‘伐卫懿公者。’贾逵云：‘处北地，后为晋所灭。’此春秋时隗姓。）”

詹 “周有詹父（庄公十八年《传》）、詹柏伯（昭公九年）圻内地，与楚詹尹异。”在今安徽。

葛 “《郡国志》：‘高阳有葛城。’今郑西北有葛乡城，一名依城，汉高阳地。然葛乡故葛城，乃在宁陵北十五，酈城北三十，周四里，去亳城百里，即葛伯国。（《说文》：酈，南阳阴乡。酈城隶许宁国，本属

应天，今隶拱、应劭、杜佑、乐史等并云古葛伯国都），非嬴姓之葛。”葛在河南。

髦氏 “依姓。《山海经》：‘髦民国近积石。’”在今青海。

狂犬 “黄帝后，任姓分。见《潜夫论》。”

鄫 “薊也，中绝。武王复继之，记皆为祝。祝，尧后。”

桥 “侨即邾桥也，葬于桥，因食其地，以世祀者……《唐表》：‘桥，姬后。’”在今陕西。

祈 “蕲也，欧阳修《祁公铭》以‘祁为黄帝之子所封’，非也。祁，少昊后。祈，黄帝后。”在今山西。

酉 “即酉阳，今黔之彭水，汉酉阳也，有酋水。”在今四川。

滕 “今徐之西南十四，有故滕城（古蕃县小邾国）……《纪年》‘越王朱句二十年灭滕’是也。”在今山东。

藏 “卫有鍼（成公六年），邵氏《姓解》作箴，皆音针。”在今河南。

任 “禹阳国。仓颉为任大夫。晋邑，今之任县。”在今河北。

苟 “战国有苟变，子思荐之（能将五百乘，荐之卫侯）。《程氏世谱》以河内多杞氏焉，妄也。”在今山西。

釐 “僖也。齐国釐城，为来音。简王十二年，舒

庸人道吴围巢及鼇虺。”在今安徽。

佶 “佶，是见诗。《风俗通》云：‘殷时侯国，一作吉。’《潜夫论》云：‘邳与姑同而字异。’周封女媯氏于南燕，邓名世以《潜夫》为误，非也。《说文》‘佶’为正。”在今山西。

偃 “与嬖同音，暄轻也。《集韵》音旋，非。”

依 “史伯说十邑有依、畴、历、萃，皆郛邑，后属郑。韦昭云‘国’。”在今河南。

纪（剧） “剧是，今齐之临朐东寿光西南故剧城，汉之剧县。郑樵云：‘纪后迁剧，所谓朐剧。’云纪、剧声讹，非也。”在今山东。

滑 在今河南。

济 在今河南。

奚 “郑樵云：‘鲁奚邑。’今徐之滕东南六十青丘村有奚公冢、奚公山。阳晔《徐州记》云：‘仲造车辙存焉’。”在今山东。

薛 “侯爵（庄公三十一年），吉光国。今滕东南五十里有故薛城，故汉县，战国属齐为徐州，秦为薛郡，有仲祠，或曰大薛。”在今山东。

伍 “邳也，今淮阳治下邳城。汉下邳国，梁下邳郡，周邳州，唐隶泗城三重，处泗、沂之会。有仲虺祠。

（《寰宇记》：‘祠在徐之沛。’有仲虺城。见《九域志》。）郑樵云‘仲虺居在薛，鲁奚仲迁邳，后以邳为薛’妄。”在今江苏。

摯 “祖己七世孙。成封周文王母太任国。今蔡之平與有摯亭。”在今河南。

谢 “欧阳修《谢绛铭》云：黄帝后者，周灭之，以封申伯，在南阳之宛，见《诗·崧高》。其地西甚广，郑公友言‘谢西之九州者’，二千五百家者也。”在今河南。

章 《章与谢，本皆任姓，周始以封太公之支子。”在今河南。

舒 “春秋之留舒，去谷七里，亦曰柳舒。故城在郛之须城，许氏作郛。郛，郛之下邑（《说文》‘郛在薛县’）。”在今山东。

洛 “周书之有洛氏，史伯云‘北有路、洛、泉、徐、浦’，韦昭云‘皆赤狄’，宜于此异。或作络（卫贤者络疑）。雒广，汉属县。”在今河南。

昌 “春秋，昌间多在河东北。”在今河北。

薊 “今范阳治地多薊。《水经注》：‘薊城西北隅，薊丘为名。’《班志》云：‘薊，故燕国名。’”在今河北。

终 “商有终古，宜即佟后有佟氏、佟通。今襄阳有洛水。”在今湖北。

泉 “洛阳西五十故伊关县北有泉亭，周世狄居之，俗呼前亭。（伊拒泉皋是也。昭二十二年有前城。）”在今河南。

卑 “宜晋郛邑，一曰郛邵（文元年）。绛之垣东

九十有郛郛，隄卑氏所出，非越雋。”在今山西。

遇 “禹也，宜即番禺。鲁襄公救成至遇（十五年）。鲁邑近成，然非必禹。”在今山东。

儋 “《山海经》：儋人任姓。今儋州，周有儋翩。”在今广东。

牛黎 “《经》云‘牛黎之国，儋人之子儋’，今有黎姥山。”在今广东。

番禺 “贲隅也。今青海之属县有禺山。《传》云‘禺号南海’，故予谓此即禺。《经》文有无肠、继无之国，皆任姓。”在今广东。

南燕 “伯爵。伯儻国，后稷妃南燕姑氏也（石癸曰‘吾闻姑姓后稷元妃’）。今滑之胙城东北，汉南燕县，隋改曰胙。”在今河北。

密须 “子爵。《世本》云：‘商有密须，文王伐之。’（《晋志》云：‘商侯国。’）鲁有密须之鼓。杜预谓姑姓国，在安定阴密，今泾之灵台也。”在今陕西。

阇 “子爵。今郛之寿张有阇乡，而阇古城在中都。（桓公十一年。《寰宇记》云：‘今属齐之钜野。’）阇亭又在须昌东南。（即昭公末年取阇者，《郡国志》‘东平陆有阇亭，今寿张也’。）齐有阇止。”在今山东。

允 “高阳时有允格，或云少昊后，出黄帝。”

蔡 “蕲春江中有蔡山，在广济县。（《高崇文传》

蔡山，寔莘云‘蕲水县北’。）大龟纳锡，故曰蔡，非姬姓蔡。”在今湖北。

光 “《春秋图》有光国，今光州。”在今湖北。

敦 “钅任、冷、敦之田，许地也，郑取之。《陈留风俗传》云：‘敦氏，媾姓后。’”在今河南。

偃 “晋襄公母，偃媾国，即周之偃阳国。”在今河南。

燕 “伯爵。宜为东燕与南燕北（昭三年北燕伯款亦媾姓）。 ”在今河北。

鲁 “汝之鲁山县，非兗地。”在今河南。

雍 “伯爵。汴之雍丘，郑庄夫人雍媾国。《姓纂》云：‘宋之雍氏本媾姓。’《寰宇记》‘雍氏，黄帝后’，媾姓是矣。又冀之堂阳东北三十六，亦有雍氏城。《寰宇》之高堰城，本于陇切。自汉州名人姓皆于用切。《谈苑》云‘当作平声’。昭十四年《传》：‘晋尸雍子。’杜云：‘阳翟东北有雍氏城者非。’”在今河南。

断 “晋地有断道，即卷楚也。《世本》作段写误。”在今山西。

密 “河南密县东四十故密城是，武德三为密州，与须城比，故说者谓即密须，盖亦号密须云（《史索》云密须今河南密县，与安定姬姓密别）。 ”在今河南。

虽 “开封长垣近须城，是卫，在今澶之卫南二十八里。《卫》诗所谓‘思须与曹’者，由声转也。”在今河

南。

四、中国各民族为黄帝之苗裔

甲、鲜 卑

《晋书·载记八》：“慕容廆字弈洛瓊，昌黎棘城鲜卑人也。其先有熊氏之苗裔，世居北夷，邑于紫蒙之野，号曰东胡。风俗与匈奴略同。”

《魏书·序纪》：“昔黄帝有子二十五人，或内列诸华，或外分荒服。昌意少子受封北土，国有大鲜卑山，因以为号。其后世为君长，统幽都之北广漠之野……黄帝以土德王，北俗谓土为托，谓后为跋，故以为氏。”

《北史·魏本纪》：“魏之先出自黄帝轩辕氏。黄帝子曰昌意。昌意之少子受封北国，有大鲜卑山，因以为号。其后世为君长，统幽都之北广漠之野。”

乙、匈 奴

《国语·鲁语》：“夏后氏禘黄帝而祖颡顓，郊鯀而宗禹。”

《史记·匈奴传》：“匈奴其先祖，夏后氏之苗裔也。”

按：夏为黄帝后，匈奴为夏后，蒙古为匈奴后，是蒙古为黄帝之苗裔。

丙、羌

《国语·鲁语》：“有虞氏禘黄帝而祖颡顓，郊尧

而宗舜。”

《晋书·载记十六》：“姚弋仲，南安赤亭羌人也。其先有虞氏之苗裔。禹封舜少子于西戎，世为羌酋。”

按：虞为黄帝后，羌为虞后，藏为羌后，是藏为黄帝之苗裔。

丁、苗 黎

《山海经》：“黄帝生禺号，禺号生禺京。”

《路史·疏仡纪·黄帝》：“禹号生禺京、傜梁、儋人。京处北海，号处南海，是为海司。……儋人任姓，生牛黎。（注：即今儋人，故儋近有黎。）傜梁生番禺，番禺是始为舟。”

戊、安 息

《路史·疏仡纪·黄帝》：黄帝“生昌意……昌意……有子三人，长曰乾荒，次安，季悃……安处西土，后曰安息。”

《汉书·西域传》：“安息国王治番兜城，去长安万一千六百里。”

按：安息在今波斯阿拉伯土耳其，为回教发祥之地。

黄帝与中国文化

一、发 明

（一）衣

《世本》：“黄帝作旃冕，胡曹作冕，伯余作衣裳，于则作扉屨。”

《拾遗记》：“轩辕始造书契，服冕垂衣，故有袞龙之颂。”

《路史·疏仡纪·黄帝》：“法乾坤以正衣裳，制袞冕，设斧黻，深衣大带，扉屨赤舄，玄衣纁裳，纁纁黼旒，以规眡听之逸；房观翬翟，草木之化，染为文章，以明上下之袞；韦衣榆展，以为内服，故于是有袞龙之颂。端璧瑞以奉天，委珩牙以燭武。是以衣裳所在，而凶恶不起。”

（二）食

《古史考》：“黄帝始蒸谷为饭，烹谷为粥。黄帝作瓦甑。”

《世本》：“雍父作春。”

（三）住

《新语》：“天下人民野居穴处，未有室屋，则与鸟兽同域，于是黄帝乃伐木构材，筑作宫室，上栋下宇，以避风雨。”

《白虎通》：“黄帝作宫室，以避寒暑，此宫室之始也。”

《黄帝内传》：“帝既斩蚩尤，因立台榭。无屋曰台，有屋曰榭。”

《路史·疏仡纪·黄帝》：“乃广宫室，壮堂庑，高栋深宇，以避风雨。作合宫，建奎殿，以祀上帝，接万灵。”“即库台，设移旅，楹复格，内阶幽陞，提唐山墙，摘干惟工，斲其材而砻之”。

《文中子》：“黄帝有合宫之听。”

（四）行

《世本》：“骸作服牛，共鼓、货狄作舟。”

《拾遗记》：“轩辕变乘桴以作舟楫。”

《汉书》：“黄帝作舟车以济不通，旁行者天下，方制万里。画野分州，得百里之国万区。”

《古史考》：“黄帝作车，引重致远，少昊时略加牛，禹时奚仲加马。”

《路史·疏仡纪·黄帝》：“命邑夷法斗之周旋，魁方标直，以携龙角，为帝车大辂，故曲其辘，绍大帝之卫。于是崇牙交旂，羽旄扈旂，搯剑华盖，属车副

乘，记里司马，以备道哄。命马师皇为牧正，臣胥服牛始驾，而仆辂之御全矣。”

《通鉴外纪》：“蚩尤为大雾，军士昏迷，轩辕作指南车以示四方。”

《黄帝内传》：“玄女为帝制司南车当其前，记里鼓车居其右。”

《古今注》：“黄帝与蚩尤战于涿鹿之野，蚩尤作大雾，兵士皆迷，于是作指南车以示四方，遂禽蚩尤，而即帝位，故后常建焉。”

（五）农

《黄帝内传》：“黄帝升为天子，地献草木，述耕种之利，因之以广耕种。”

《论语纤》：“轩知地利，九牧倡教。”

《路史·疏仡纪·黄帝》：“命西陵氏劝蚕稼。”

《黄帝内传》：“黄帝斩蚩尤，蚕神献丝，乃称织维之功。”

《路史·疏仡纪·黄帝》：“经土设井，以塞争端；立步制亩，以防不足。八家以为井，井设其中，而收之于邑。”

（六）工

《路史·疏仡纪·黄帝》：“赤将为木正，以利器用。”

《列仙传》：“宁封子，黄帝时人也，为黄帝陶正。”

（七）矿

《管子》：“黄帝问于伯高曰：‘吾欲陶天下而为

一家，为之有道乎？’伯高对曰：‘请刈其莞而树之，吾谨逃其早牙，则天下可陶而为一家人。’黄帝曰：‘若此言可得闻乎？’伯高对曰：‘上有丹沙者，下有黄金；上有慈石者，下有铜金；上有陵石者，下有铅锡赤铜；上有赭者，下有铁。’”

《拾遗记》：“昆吾山其下多赤金，色如火。昔黄帝伐蚩尤，陈兵于此，掘深百尺，犹未及泉，惟见火光如星，地中多丹，炼石为铜，铜色青而利。”

《路史·疏仡纪·黄帝》：“上有丹矸者，下有黄银；上有慈石者，下有铜金；上有陵石，下有赤铜青金；上有代赭，下有鉴铁；上有葱，下有银沙。此山之见荣者也。至于艾而时之，则货币于是乎成。乃燹山林，破曾蕞，楚莱沛；以制金刀，立五币，设九棘之利，而为轻重之法。”

（八）商

《路史·疏仡纪·黄帝》：“五置而有市，市有馆，以俟朝聘之需。”

（九）货 币

《路史·疏仡纪·黄帝》：“于是立货币以制国用。”

（十）文 字

《世本》：“史皇作书。”

《淮南子》：“苍颉作书，而天雨粟，鬼（一作兔）夜哭”，“史皇生而能书”。

《孝经援神契》：“奎主文章，苍颉效象洛龟，曜

书丹青，垂萌画字。”

卫恒《书势》：“黄帝之史沮诵、仓颉，眡彼鸟迹，始作书契，纪纲万事，垂法立则。”

《河图玉版》：“仓颉为帝，南巡登阳虚之山，临于玄扈、洛汭之水，灵龟负书丹甲青文以授之。”

《春秋元命苞》：“仓帝史皇氏，名颉，姓侯冈，龙颜侈哆，四目灵光，实有睿德。生而能书，及授河图绿字，于是穷天下之变，仰观奎星圆曲之势，俯察龟文鸟羽山川指掌，而创文字。天为雨粟，鬼为夜哭，龙乃潜藏。治百有一十载，都于阳武，终葬衙之利乡亭。”

《路史·疏仡纪·黄帝》：“乃命沮诵作云书，孔甲为史，执青纂记，言动惟实。”

《论衡》：“苍颉四目，为黄帝史。”

（十一）图 画

《论衡》：“黄帝门户画神荼、郁垒与虎。”

《龙鱼河图》：“黄帝遂画蚩尤形象以威天下。”

（十二）弓 箭

《世本》：“挥作弓，牟夷作矢。”

《古史考》：“黄帝作弩。”

《路史·疏仡纪·黄帝》：“命挥作盖弓，夷牟造矢，以备四方。”

（十三）音 乐

《吕氏春秋》：“昔黄帝令伶伦作为律。伶伦自大

夏之西，乃之阮隃之阴，取竹于嶰谿之谷，以生空窍厚钩者，断两节间，其长三寸九分，而吹之，以为黄钟之宫。次曰含少。次制十二筒，以之阮隃之下。听凤凰之鸣，以别十二律，其雄鸣为六，雌鸣亦六，以比黄钟之宫。适合黄钟之宫，皆可以生之，故曰黄钟之宫，律吕之本。黄帝又命伶伦与荣将铸十二钟，以和五音，以施英韶，以仲春之月，乙卯之日，日在奎，始奏之，命之曰《咸池》。”

《世本》：“伶伦造磬。黄帝使素女鼓瑟，哀不自胜，乃破为二十五弦，异二均声。”

《易是类谋》：“圣人兴起，不知姓名，当吹律听声以别其姓。黄帝吹律以定姓是也。”

《管子》：“黄帝以其缓急作五声，以政五钟。令其五钟：一曰青钟大音，二曰赤钟重心，三曰黄钟洒光，四曰景钟昧其明，五曰黑钟隐其常。五声既调，然后作立五行以正天时，五官以正人位。人与天调，然后天地之美生。”

《路史·疏仡纪·黄帝》：“伶伦造律，采解谿之篁，断篁间三寸九分，为黄钟之宫，曰含少。制十有二筒，以之阮隃之下，听凤之鸣，以定其雌。乃作玉律，以应候气，荐之宗庙，废治忽以知三军之消息，以正名百物，明民共财而定氏族。”

《路史·疏仡纪·黄帝》：“乃本阴阳，审风声，命荣援铸十二钟，以协月简，以诏英韶。调政之缓急，

分五声以正五钟，令其五中以定五音。伶伦造声，以谐八音。五音调以立天时，八音交以正人位，人天调而天地之美生矣。命大容作承云之乐，是为云门；大卷著之控裼，以道其和。中阳之月，乙卯之辰，日在奎而奏之，弛张合施，动静丽节，是故翕纯皦绎声而听严，五降之后而不弹矣。令曰《咸池》。”

《黄帝内传》：“黄帝伐蚩尤，玄女为帝制夔牛鼓八十面，一震五百里，连震三千八百里。”

《路史·疏仡纪·黄帝》：“岐伯鼓吹铙角，灵鞮神铎，以扬德建武，厉士风敌，而威天下。”

《黄帝内传》：“玄女请帝制角二十四以警众，请帝铸铎铙以凝雷之声。”

《古今注》：“短箫、铙歌，军乐也，黄帝使岐伯所作也，所以建武扬德、风劝战士也。”

《山海经》：“东海中有流波山，入海七千里，其上有兽，状如牛，苍身而无角，一足，出入水则必风雨。其光如日月，其声如雷，其名曰夔。黄帝得之，以其皮为鼓，擷以雷兽之骨，声闻五百里，以威天下。”

《归藏》：“蚩尤，黄帝杀之于青丘，作柎鼓之曲十章：一曰雷震惊，二曰猛虎骇，三曰鸷鸟击，四曰龙媒蹶，五曰灵夔吼，六曰雕鹗争，七曰壮士夺志，八曰熊黑哮吼，九曰石荡崖，十曰波荡壑。”

（十四）医 药

《路史·疏仡纪·黄帝》：“谓人之生也负阴而抱

阳，食味而被色，寒暑荡之外，喜怒攻之内，夭昏凶札，君民代有，乃上穷下际，察五气，立五运，洞性命，纪阴阳，极咨于岐雷而《内经》作。谨候其时，著之玉版，以藏灵兰之室。演仓谷，推贼曹，命俞附、岐伯、雷公察明堂，空息脉，谨候其时，则可万全。命巫彭、桐君处方，盆饵湔澣刺治，而人得以尽年。”

《帝王世纪》：“黄帝命雷公、岐伯论经脉旁通，问难八十为难经，教制九针，著内外术经十八卷。”

（十五）婚 姻

《路史·疏仡纪·黄帝》：“氏定而系之姓，庶姓别于上，而戚殫于下，婚姻不可以通，所以崇伦类、远禽兽也。”

《通鉴外纪》：“嫁娶相媒。”

（十六）丧 葬

《路史·疏仡纪·黄帝》：“乃饰棺衾以送死，封崇表木，以当大事。”

（十七）历 数

《世本》：“大挠作甲子，容成作历，隶首作数。”

《拾遗记》：“轩辕考定历，以吹玉律正璇衡。”

《路史·疏仡纪·黄帝》：“乃设灵台，立五官，以叙五事。命夷菑占星，斗苞授规，正日月星辰之象。分星次象应，著名始终相验，于是乎有星官之书。浮箭为泉，孔壶为漏，以考中星。命羲和占日，僣珥旺适，纓纽抱负，关启亡浮；尚仪占月，绳九道之侧匿，纠五精

之留疾；车区占风，道八风以通二十四；隶首定数，以率其羨要其会，而律度量衡由是成焉。”

《隋书》：“星官之书，自黄帝始。”

（十八）阴阳五行

《春秋内事》：“黄帝师于风后，风后善于伏羲之道，故推演阴阳之事。”

《路史·疏仡纪·黄帝》：“大挠正甲子，探五行之情，而定之纳音。风后释之，以致其用，而三命行矣。察三辰于上，迹祸福于下，经纬历数，然后天步有常而不倍。命容成作盖天，综六术以定气象。问于鬼臾蔑曰：‘上下周纪，其有数乎？’对曰：‘天以六节，地以五制。周天气者，六期为备；终地气者，五岁为周。五六合者岁，三千七百二十气为一纪，六十岁千四百四十气为一周。太过不及，斯以见矣。乃因五量治五气，起消息，察发敛，以作调历，岁纪甲寅，日纪甲子，立正爻以配气，致种爻以抵日，而时节定。是岁己酉朔旦南至，而获神策，得宝鼎。冕侯问于鬼容蔑，容蔑对曰：

“是谓得天之纪，终而复始，爰兴封禅，迎日推策，造六十神历，积邪分以置闰，配甲子而设蓐。岁七十六以为纪，纪二十而蓐首定之，原名握先，率二十而冬至复朔。凡二十推三百八十年而策定，然后时惠而辰从。”

（十九）伞

《古今注》：“黄帝与蚩尤战于涿鹿之野，常有五色云气，金枝玉叶，止于帝上。有花葩之象，故因而作

华盖也。”

（二十）镜

《黄帝内经》：“帝与王母会于王屋，乃铸火镜十二面，随月用之，则镜始于轩辕矣。”

二、著 作

《汉书·艺文志》关于黄帝及黄帝时人之著作如（左）：

《黄帝四经》四篇（道家）

《黄帝铭》六篇（道家）

《黄帝君臣》十篇（道家）

《杂黄帝》五十八篇（道家）

《黄帝泰素》二十篇（阴阳）

《黄帝说》四十篇（小说）

《太壹兵法》一篇（兵、阴阳）

《黄帝》十六篇（阴阳）

《黄帝杂子气》三十三篇（天文）

《泰阶六符》一卷（天文）

《黄帝五家历》三十三卷（历谱）

《黄帝阴阳》二十五卷（五行）

《黄帝诸子论阴阳》二十五卷（五行）

《黄帝长柳占梦》十一卷（杂占）

《黄帝内经》十八卷（医经）

《外经》十九卷（医经）
《泰始黄帝扁鹊俞附方》二十三卷（方经）
《神农黄帝食禁》七卷（方经）
《黄帝三王养阳方》二十卷（房中）
《黄帝杂子步引》十二卷（神仙）
《黄帝岐伯按摩》十卷（神仙）
《黄帝杂子芝菌》十八卷（神仙）
《黄帝杂子十九家方》二十一卷（神仙）
《力牧》二十二篇（道家）
《力牧》十五卷（阴阳）
《容成子》十四篇（阴阳）
《成公生》五篇（名家）
《孔甲盘盂》二十六篇（杂家）
《封胡》五篇（阴阳）
《风后》十三篇（阴阳）
《风后弧虚》二十卷（五行）
《鸛冶子》一篇（阴阳）
《鬼容区》三篇（阴阳）
《容成阴道》二十六卷（房中）
《天老杂子阴道》二十五卷（房中）

《帝王世纪》：“黄帝命雷公、岐伯论经脉旁通，问难八十为《难经》，教制九针，著内外《经》十八卷。”

《路史·疏仡纪·黄帝》：“河龙图发，洛龟书威，于是正坤乾，分离坎，倚象衍数，以成一代之宜。谓土

为祥，乃种坤以为首，所谓《归藏易》也。”

《乾坤凿度》：“炎帝、黄帝有易灵纬，太卜掌三易之法，一曰连山，二曰归藏。杜子春云：“连山宓戏，归藏黄帝。”

《路史·疏仡纪·黄帝》：“正日月星辰之象，分星次象应，著名始终相验，于是乎有星官之书。”

《轩辕黄帝传》：“玄女传《阴符经》三百言，帝观之十旬，讨伏蚩尤。”

黄帝又著十六神历，推太一六壬等法；又述六甲阴阳之道，作《胜负握机》之图，及兵法要诀《黄帝兵法》三卷。

《河图出军诀》称黄帝得王母兵符又有：

《出军大帅年立成》各一卷

《太一兵历》一卷

《黄帝出军新用诀》一十二卷

《黄帝夏氏占兵气》六卷

《黄帝十八阵图》二卷

《黄帝问玄女之诀》三卷

《风后孤虚诀》二十卷

《务成子亥兵灾异占》十四卷

《鬼臾区兵法》三卷，图一卷

……收得蚩尤兵书：

《行军秘术》一卷

《蚩尤兵法》二卷

又见黄盖童子受《神芝图》七十二卷。适中岱，见中黄子，受九茹之方。……广成子乃授以《自然经》一卷。

《帝王世纪》：“黄帝因著《占梦经》十一卷。”

《平津馆丛书》有：

《龙首经》二卷

《金匱玉衡经》一卷

《玄女经》一卷

《本行经》一卷

《轩辕黄帝传》一卷

《双梅景阁丛书》有：

《素女经》一卷

《素女方》一卷

《玉房秘诀》一卷

《归藏》：“蚩尤……黄帝杀之于青丘，作柷鼓之曲十章：一曰雷震惊，二曰猛虎骇，三曰鸢鸟挚，四曰龙媒蹶，五曰灵夔吼，六曰雕鹗争，七曰壮士夺志，八曰熊黑哮吼，九曰石荡崖，十曰波荡壑。

黄 帝 之 政 绩

一、臣 友

《左传》昭十七年：“黄帝氏以云纪，故为云师而云名。”

《史记》：“官名皆以云名为云师……举风后、力牧、常先、大鸿以治民”，“神农以前尚矣，盖黄帝考定星历，建立五行，起消息，正闰余，于是有天地神祇物类之官，是为五官，各司其序，不相乱也。民是以能有信，神是以能有明，德明神异，业敬而不渎，故神降之嘉生，民以物享，灾祸不生，所求不匮。”

《论语摘辅象》：“黄帝七辅，风后受金法，天老受天箴，五圣受道级，知命受纠俗，窥纪受变复，地典受州络，力墨受准，斥州选举，翼佐帝德。”

《管子》：“黄帝得六相而天地治，神明至。蚩尤明乎天道，故使为当时；大常察乎天利，故使为廩者；奢龙辨乎东方，故使士师；祝融辨乎南方，故使为司徒；大封辨乎西方，故使为司马；后土辨乎北方，故使为

李。是故春者土师也，夏者司徒也，秋者司马也，冬者李也。”

《帝王世纪》：“黄帝以风后配上台，天老配中台，五圣配下台，谓之三公。其余知名、规纪、地典、力牧、常先、封胡、孔甲等，或以为师，或以为将。”

《尸子》：“子贡问孔子曰：‘古者黄帝四面，信乎？’孔子曰：‘黄帝取合己者四人，使治四方，不谋而亲，不约而成，大有成功，此之谓四面也。’”

《淮南子》：“黄帝治天下，而力牧、太山稽辅之，以治日月之行律，治阴阳之气，节四时之度，正律历之数，别男女，异雌雄，明上下，等贵贱，使强不掩弱，众不暴寡，人民保命而不夭，岁时熟而不凶，百官正而无私，上下调而无尤，法令明而不濫，辅佐公而不阿，田者不侵畔，渔者不争隈，道不拾遗，市不豫贾，域廓不关，邑无盗贼，鄙旅之人相让以财，狗彘吐菽粟于路，而无忿争之心。”

《帝王世纪》：“黄帝梦大风吹，天下之尘垢皆去，又梦人执千钧之弩驱羊万群。帝寤而叹曰：‘风为号令，故执政者，垢去土后在也。天下岂有姓风名后者哉！夫千钧之弩，异力者也；驱羊数万，能牧民为善者也。天下岂有姓力名牧者哉！’于是依二占而求之，得风后于海隅，登以为相；得力牧于大泽，进以为将。黄帝因著《占梦经》十一卷。”

《拾遗记》：“置四史以主图籍，使九行之士以统万

国。九行者，孝、慈、文、信、言、忠、恭、勇、义，以观天地，以祠万灵，亦为九德之臣。”

《逸周书》：“乃令少昊请司马鸟师以正五帝之官。”

《帝王世纪》：“又征诸侯，使力牧、神皇直讨蚩尤氏，使应龙杀之于凶黎之丘。”

《山海经》：“蚩尤作兵伐黄帝，黄帝乃令应龙攻之冀州之野。应龙蓄水，蚩尤请风伯、雨师纵大风雨。黄帝乃下天女曰魃，雨止，遂杀蚩尤。”

《论语撰考讖》：“黄帝受地形象天文以制官。”

《帝王世纪》“黄帝受命，风后受图，割地布九州，置十二国。”

《论语讖》：“轩知地利，九牧倡教。”

《论衡》：“仓颉四目，为黄帝史。”

卫恒《书势》：“黄帝之史沮诵、苍颉。”

《史记》：“黄帝得宝鼎宛胸，问于鬼臾区”。“鬼臾区号大鸿，死葬雍，故鸿冢是也。”

《管子》：“黄帝问于伯高曰：‘吾欲陶天下而以为一家，为之有道乎？’”

《玄女兵法》：“黄帝攻蚩尤，三年城不下，得卫士伍臂而问之。”

《庄子》：“北门成问于黄帝曰：‘帝张《咸池》之乐，于洞庭之野？’”

《春秋合城图》：“黄帝游于玄扈洛水上，与大司

马容光等临观。”

《河图挺辅佐》：“黄帝修德立义，天下乃治，乃召天老而问焉。”

《宋符瑞志》：“秋七月庚申，天雾三日三夜，昼昏，黄帝以问天老、力牧、容成。”

《内经·素问》：“黄帝问曰……岐伯对曰……”

《吕氏春秋》：“黄帝令伶伦作为律……黄帝又命伶伦与荣将铸十二钟。”

《庄子》：黄帝“遗其玄珠，使知索之而不得，使离朱索之而不得，使喫诟索之而不得也。乃使象罔，象罔得之。”

《拾遗记》：“帝使风后负书，常伯荷剑。”

《列仙传》：“宁封子，黄帝时人也，为黄帝陶正。”

《列仙传》：“马师皇者，黄帝时马医也。”

《遁甲开山图》：“绛北有阳石山，有神龙池，黄帝遣云阳先生养龙于此。”

《庄子》：“黄帝氏立巫咸，使之沐浴斋戒。”

《博物志》：“黄帝登仙，其臣左彻者，削木象黄帝，帅诸侯以朝之。”

《纪年》：“帝以土德王，应地裂而沛葬。群臣有左彻者，感思帝德，取衣冠几杖而庙飨之。”

《路史·疏仡纪·黄帝》：“其即位也，适有云瑞，因以云纪，百官师长俱以云名。乃立四辅、三公、

六卿、三少，二十有四官，凡百二十官，有秩以之共理，而视四民。”

《路史·疏仡纪·黄帝》：“令知命纠俗，天老录教，力牧准斥，鸛治决法，五圣道级，阙纪补阙，地典州络，七辅得而天下治”。“而肆志于昆台，方明执舆，昌寓参乘，张若、谏朋前马，昆阇、滑稽后车，风后、柏常从负书剑”。“于是申命封胡以为丞，鬼容苴为相，力牧为将，而周昌辅之；大山稽为司徒，庸光为司马，恒先为司空”。“奢比辨乎东以为士师，庸先辨乎南以为司徒，大封辨乎西以为司马，后土辨乎北以之行李”。乃设灵台、立五官以叙五事，命夷苴苴占星，斗苞授规；命羲和占日，尚仪占月，车区占风，隶首定数，伶伦造律，大挠正甲子；命容成作盖天；命大容作承云之乐，大卷著之控褐；命宁封为陶正，赤将为木正；命挥作盖弓，夷牟造矢，岐伯作鼓；命邑夷法斗之周旋；命马师皇为牧正，臣胥服牛。乃命沮诵作云书，孔甲为史；命俞附、岐伯、雷公、巫彭、桐君处方；命西陵氏劝蚕稼；命共鼓、化狐作舟车；命竖亥通道路；命风后方割万里。

《符子》：“黄帝命方明、游路谓容成子。”

《通鉴外纪》：“举风后、力牧、太山稽、常先、大鸿，得六相而天地治。奢龙辨乎东方，故为士师；祝融辨乎南方，故为司徒；大封辨乎西方，故为司马；后土辨乎北方，故为李。史官苍颉造文字。”

《路史·疏仡纪·黄帝》：“登空桐而问广成，封

东山而奉中华君，策大面而礼宁生，入金谷而咨涓子心。访大恢于具茨，即神牧于相成。升鸿堤受神芝于黄盖，“师于大填，学于封巨、赤诵。复岐下见岐伯，引载而归，访于治道。”

《庄子》：“黄帝立为天子十九年，令行天下，闻广成子在于空同之上，故往见之。”

《庄子》：“黄帝将见大隗乎具茨之山……适遇牧马童子问途焉。”

《春秋合诚图》：“黄帝请问太一长生之道。”

《庄子》：“知非游于玄水，适遭无为谓焉，而睹狂屈焉。反于帝宫，见黄帝而问焉。黄帝曰：‘彼无为谓真是也。狂屈似之，我与汝终不近也。’”

《泰壹杂子》：“黄帝谒峨嵋，见天真皇人拜之。”

《抱朴子》：“黄帝东到青丘，过风山，见紫府先生，受三皇内文；西见中黄子，受九加之方；过洞庭，从广成子受自然之经；北到洪堤，上具茨，见大隗君黄盖童子，受神芝图；还陟王屋，得神丹金诀；到峨嵋山，见天真皇真人于玉堂。”

《抱朴子》：“黄帝登崆峒而问广成，之具茨而事大隗，适东岱而奉中黄，入金谷而咨滑子，论导养而质玄素二女，精推步则访山稽、力牧，讲占候则询风后，著体诊则受岐、雷。”

《西京杂记》：“黄帝时，西王母献昭华玉琯。”

《黄帝内经》：“帝既与王母会于王屋。”

《玄女兵法》：“王母遣使者以授符。王母乃命九天玄女授帝以三宫五音。”

《龙鱼河图》：“天遣玄女下授黄帝兵信神符，制伏蚩尤。”

二、功 德

《鬻子》：“黄帝十岁，知神农之非而改其政。”

《国语·鲁语》：“黄帝能成命百物，以明民共财。”

《史记》：“轩辕之时，神农氏世衰，诸侯相侵伐，暴虐百姓，而神农氏弗能征。于是轩辕乃习用干戈，以征不享，诸侯咸来宾从……炎帝欲侵陵诸侯，诸侯咸归轩辕。轩辕乃修德振兵，治五气，艺五种，抚万民，度四方，教熊黑貔貅貆虎，以与炎帝战于阪泉之野。三战然后得其志。”

《帝王世纪》：“神农氏衰，黄帝修德抚万民，诸侯咸去神农而归之黄帝。于是乃扰驯猛兽，与神农氏战于阪泉之野，三战而克之。”

《新书》：“炎帝者，黄帝同父异母兄弟也，各有天下之半。黄帝行道，而炎帝不听，故战涿鹿之野，血流漂杵。”

《归藏》：“黄帝与炎帝争斗涿鹿之野。将战，筮于巫咸。巫咸曰：‘果哉！而有咎。’”

《国语》：“少典……生炎帝、黄帝……成而异德

……用师以相济也。”

《史记》：“有土德之瑞，故号黄帝。”

《吕氏春秋》：“黄帝之时，天先见大螾大蜥。黄帝曰：‘土气胜。’土气胜，故其色尚黄，其事则土。”

《春秋演孔图》：“黄帝之将兴，黄云升于堂。”

《春秋考异邮》：“黄帝将兴，有黄雀赤头，立日旁。帝占曰：‘黄者土精，赤者大荣，雀者尚萌，余当立大功乎？’”

《春秋合诚图》：“黄帝德冠帝位。”

《万机论》：“黄帝之初，养性爱民，不好战伐，而四帝各以方色称号，交共谋之，边城日警，介冑不释。黄帝叹曰：‘君危于上，民不安于下，一王失于国，其臣再嫁。厥疾之由，非养寇耶？今取民萌之上，而四道亢衡，递震于师。’于是遂师营垒，以灭四帝。向令黄帝若不龙骧虎变，而与俗同道，则其民臣再嫁于四帝矣。”

《管子》：“黄帝之治天下也，其民不引而来，不推而往，不使而成，不禁而止。故黄帝之治也，置法而不变，使民安其法者也。”

《轩辕黄帝传》：“耕者不侵畔，渔者不争岸，抵市不预，价市不开，鄙商旅之人相让以财，外户不闭，是谓大同。帝理天下十五年，忧念黎庶之不理，端聪明，进智力，以营百姓。是时，庶民甘其食，美其服，

乐其俗，安其居，无羡慕之心，邻国相望，鸡犬相闻，至老死不相往来。”

《路史·疏仡纪·黄帝》：“耕父推畔，道不拾遗，狗彘吐菽粟，而城郭不闭，人保命而不夭，岁时熟而亡凶，天地休通，五行期化，故风雨时节，而日月精明。星辰不失其行，冀荚屈轶，紫房赭茎，史不废书，海不扬波，山不爱宝。翠黄伏棺，兹白恋皂，焦明欢阿，而龙麟扰于阶除。日蟹虹蜺，禹蛄牛蚁，黄神黄爵，白泽解荐，府亡虚日。是以九瀛仰化，诸北贡职，杨裘柜鬯，贯匈长股，莫不来庭而依朔。”

《拾遗记》：“置四史以主图籍，使九行之士以统万国。九行者，孝、慈、文、信、言、忠、恭、勇、义，以观天地，以祠万灵，亦为九德之臣。韶令百辟，群臣爱德教者，先列珪玉于兰蒲席上，然沈榆之香，春杂实为膏，以沈榆之胶和之为泥以涂地，分别尊卑华戎之位也。”

三、祥瑞

《淮南子》：“黄帝治天下……日月精明，星辰不失其行；风雨时节，五谷登熟，虎狼不妄噬，鸷鸟不妄搏；凤凰翔于庭，麒麟游于郊，青龙进驾，飞黄伏皂，诸北、僇耳之国，莫不献其贡职。”

《尸子》：“四夷之民，有贯胸者，有深目者，有

长肱者，黄帝之德尝致之。”

《宋符瑞志》：“黄帝时，南夷乘白鹿来献鬯。”

《宋符瑞志》：“圣德光被，群瑞毕臻，有屈轶之草生于庭，佞人入朝，则草指之，是以佞人不敢进。有景云之瑞，有赤方气与青方气相连。赤方中有两星，青方中有一星，凡三星皆黄也。以天下清明时见于摄提，名曰景星。”

《帝王世纪》：“黄帝斋于中宫，有大鸟，鸡头、燕啄、龙形、龟颈、麟翼、鱼尾，状如鹤体，备五色，三文成字：首文曰顺德，背文曰信义，膺文曰仁智。不啄生虫，不履生草。或止帝之东园，或巢阿阁，或鸣于庭。其饮食也，其雄自歌，其雌自舞，音如箫笙。”

《尚书中候》：“帝轩提象，配永修机。麒麟在囿，鸾凤来仪。”

《河图挺辅佐》：“黄帝修德立义，天下乃治。乃召天老而问焉：‘余梦见两龙挺白图，以授余河之都。’天老曰：‘河出龙图，洛出龟书，黄帝录列圣人之姓号、典谋，治太平，然后凤凰处之。今凤凰已下三百六十日矣，天其授帝图乎？’黄帝乃祓斋七日，至于翠妫州，大鲈鱼折溜而至，乃与天老迎之，五色毕具。鱼汛白图兰叶朱文以授黄帝，名曰录图。”

黄帝之仙化与陵墓

一、修 仙

《庄子》：“黄帝立为天子十九年，令行天下，闻广成子在于空同之上，故往见之曰：‘我闻吾子达于至道，敢问至道之精。吾欲取天地之精，以佐五谷，以养民人。吾又欲官阴阳以遂群生，为之奈何？’广成子曰：

‘而所欲问者，物之质也；而所欲官者，物之残也。自而治天下，云气不待族而雨，草木不待黄而落，日月之光益以荒矣。而佞人之心翦翦者，又奚足以语至道！’黄帝退，捐天下，筑特室，席白茅，闲居三月，复往邀之。广成子南首而卧，黄帝顺下风膝行而进，再拜稽首而问曰：‘闻吾子达于至道，敢问治身，奈何可以长久？’广成子蹶然而起曰：‘善哉问乎。来！吾语汝至道。至道之精，窈窕冥冥；至道之极，昏昏默默；无视无听，抱神以静，形将自正，必静必清。无劳汝形，无摇汝精，乃可以长生。目无所见，耳无所闻，心无所

知，汝神将守形，形乃长生。慎汝内，闭汝外，多知为败我。为汝遂于大明之上矣，至彼至阳之原也；为汝入于窈冥之门矣，至彼至阴之原也。天地有官，阴阳有藏，慎守汝身，物将自壮，我守其一，以处其和。故我修身千二百岁矣，吾形未尝衰。’黄帝再拜稽首曰：‘广成子之谓天矣。’广成子曰：‘来！吾语汝。彼其物无穷，而人皆以为终；彼其物无测，而人皆以为极。得吾道者，上为皇，而下为王；失吾道者，上见光，而下为土。今夫百昌皆生于土，而反于土。故余将去汝，入无穷之门，以游无极之野，吾与日月参光，吾与天地为常。当我缙乎？远我昏乎？人其尽死，而我独存乎？’

黄帝将见大隗乎具茨之山，方明为御，昌寓骖乘，张若、謵朋前马，昆阇、滑稽后车，至于襄城之野，七圣皆迷，无所问途，适遇牧马童子问途焉。曰：‘若知具茨之山乎？’曰：‘然。’‘若知大隗之所存乎？’曰：‘然。’

黄帝曰：‘异哉小童！非徒知具茨之山，又知大隗之所存。请问为天下！’小童曰：‘夫为天下者，亦若此而已矣！又奚事焉。余少而自游于六合之内，余适有瞽病，有长者教予曰：‘若乘日之车，而游于襄城之野。’今余病少痊，予又且复游于六合之外。夫为天下，亦若此而已，予又奚事焉！’

黄帝曰：‘夫为天下事，则诚非吾子之事。虽然，请问为天下！’小童辞，黄帝又问。小童曰：‘夫为天下者，亦奚以异乎牧马者哉？亦去其害马者而已矣。’

黄帝再拜稽首，称天师而退。”“知北游于玄水

之上，登隱斧之丘，而适遭无为谓焉。知谓无为谓曰：

‘予欲有问乎！若何思何虑则知道？何处何服则安道？何从何道则得道？’三问而无为谓不答也。非不答，不知答也。知不得问，反于白水之南，登狐阙之上，而睹狂屈焉。知以之言也问乎狂屈。狂屈曰：‘唉！予知之，将语若中欲言，而忘其所欲言。’知不得问，反于帝宫，见黄帝而问焉。黄帝曰：‘无思无虑，始知道；无处无服，始安道；无从无道，始得道。’知问黄帝曰：‘我与若知之，彼与彼不知也，其孰是邪？’黄帝曰：‘彼无为谓真是也，狂屈似之，我与汝终不近也。夫知者不言，言者不知。故圣人行不言之教。道不可致，德不可至，仁可为也，义可亏也，礼相伪也。故曰失道而后德，失德而后仁，失仁而后义，失义而后礼。礼者道之华，而乱之首也。故曰为道者日损，损之又损之，以至于无为。无为而无不为也。今已为物也，欲复归根，不亦难乎？其易也，其惟大人乎？生也死之徒，死也生之始，孰知其纪？人之生，气之聚也，聚则为生，散则为死，若死生为徒，吾又何患？故万物一也。是其所美者为神奇，其所恶者为臭腐，臭腐复化为神奇，神奇复化为臭腐。故曰通天下一气耳，圣人故贵一。’知谓黄帝曰：‘吾问无为谓，无为谓不应我。非不我应，不知应我也。吾问狂屈，狂屈中欲告我，而不我告。非不我告，中欲告而忘之也。今予问乎若，若知之奚故不近？’黄帝曰：‘彼其真是也，以其不知也。此其似之也，以其忘

之也。予与若终不近也，以其知之也。’狂屈闻之，以黄帝为知言。”

《春秋合诚图》：“黄帝请问太一长生之道。太一曰：‘斋戒五丁，道乃可成。’”

《符子》：“黄帝将适昆虞之丘，中路逢容成子乘翠华之盖，建日月之旗，骖紫虬，御双鸟。黄帝方明游路，谓容成子曰：‘吾将钓于一壑，栖于一丘。’”

《泰壹杂子》：“黄帝谒峨嵋见天真皇人，拜之玉堂，曰：‘敢问何为三一之道？’皇人曰：‘既已君统矣，又咨三一，无乃郎抗乎？古之圣人，盖三辰，立晷景，封域以判邦，山川以分阴阳，寒暑以守岁，道执以卫众，交质以聚民，借械以防奸，军服以章等，皆法乎天，而鞠乎有形者也。天地有启闭，日星有薄失，治乱有运会，阴阳有期数，贤愚之蔽，寿夭之质，贵贱之事，吉凶之故，一成而不变，类气浮于上，而精气萃于下，性发乎天命，成于人，使圣人以为之纪。是以圣人欲治天下，必先身之，立权以聚财，葵财以施智，因智以制义，由义以出信，仗信以著众，用众以行仁，安仁以辅道，迪道以保教，善教以政俗，从俗以毓质，崇质以恢仁；勤行以典礼，制礼以定情，原情以道性，复性以一德，成德以叙命，和命以安生。而天下自尔治，万物自尔得，神志不劳而真一定矣。子以藁尔之身，而百夫之所为备，故天和莫至，悔吝屡戾生杀。失寒暑之宜，动静戾刚柔之节，而贪欺终无所用，无乃已浮乎？’

黄帝乃终身弗违，而天下治。”

《拾遗记》：“帝使风后负书，常伯荷觚，旦游洹流，夕归阴浦，行万里而一息，洹流如沙尘，是践则陷，其深难测，大风吹沙如雾，中多神龙鱼鳖，皆能飞翔。有石蕖青色，坚而甚轻，从风靡覆其波上，一茎有叶，千年一花。其地一名沙澜，言沙踊起而成波澜也。”

《列仙传》：“宁封子，黄帝时人也，为黄帝陶正。有异人通之，为其掌火，能出五色烟。久则以教封子，封子积火自烧，而随烟气上下，视其灰烬犹有骨。时人共葬于宁北山，故谓之曰宁封子焉。”

《遁甲开山图》：“绛北有阳石山，有神龙池，黄帝遣云阳先生养龙于此。帝王历代养龙之处，因有水旱，不时祀池请雨。”

《论衡》：“沧海之中有度朔之山，上有大桃木，其屈蟠三千里，其枝间东北曰鬼门，万鬼所出入也。上有二神人，一曰神荼，二曰郁垒，主阅领万鬼。恶害之鬼，执以苇索，而以食虎。于是黄帝乃作礼以时驱之，立大桃人，门户画神荼、郁垒与虎，悬苇以御凶魅，有形故以食虎。”

《史记·封禅书》：“黄帝时万诸侯，而神灵之封居七千。天下名山八，而三在蛮夷，五在中国。中国华山、首山、太室、泰山、东莱，此五山黄帝之所常游，与神会。黄帝且战且学仙。”

《易林》：“黄帝出游，驾龙乘风，东上太山，南游

齐鲁。”

二、铸鼎与化升

《史记·封禅书》：“黄帝作宝鼎三，象天、地、人。”

《鼎录》：“金华山黄帝作一鼎，高一丈三尺，中如十石瓠，象龙腾云，百神兽满其中。”

《一统志》：“河南阌乡县南二十五里有铸鼎原。”

《古今注》：“世称黄帝炼丹于凿硯山乃得仙，乘龙上天，群臣悉持龙须，龙须坠而生草曰龙须。”

《史记·封禅书》：“公孙卿曰：‘……黄帝采首山铜铸于荆山下。鼎既成，有龙垂胡髯，下迎黄帝。黄帝上骑，群臣后宫从上者七十余人。龙乃上去。余小臣不得上，乃悉持龙髯，龙髯拔堕，堕黄帝之弓。百姓仰望黄帝既上天，乃抱其弓与胡髯号，故后世因名其处曰鼎湖，其弓曰乌号。’于是天子（汉武帝）曰：‘嗟乎！吾诚得如黄帝，吾视去妻子如脱屣耳。’……其来年冬……遂北巡朔方，勒兵十余万，还，祭黄帝冢桥山，释兵须如。上曰：‘吾闻黄帝不死，今有冢何也？’或对曰：‘黄帝已仙上天，群臣葬其衣冠。’”

《皇览》：“好道者言黄帝乘龙升云登朝霞，上至列阁倒影，经过天官。”

《通鉴外纪》：“帝采首山之铜，铸鼎于荆山之

隅，鼎成崩焉。其臣左彻取衣冠几杖而庙祀之。”

《博物志》：“黄帝登仙，其臣左彻者，削木象黄帝，率诸侯以朝之。”

《路史·疏仡纪·黄帝》“采首山之铜，铸三鼎于荆山之阳，以象泰乙，能轻能重，能读能行，存亡是谗，吉凶可知。武豹百物为之眡火参炉。八月既望，鼎成死焉，葬上郡阳周之桥山。其臣左彻感思，取衣冠几杖而庙像之，率诸侯而朝焉。”

《纪年》：“帝以土德王，应地裂而沛葬，群臣有左彻者，感思帝德，取衣冠几杖而庙飨之，诸侯大夫岁时朝焉。”

《剑经》：“黄帝铸鼎以疾崩，葬桥山。后五百年山崩，空室无尸，惟存宝剑赤舄。”

《列仙传》：“黄帝自择亡日，至七十日亡。七十日还葬于桥山。”

《帝王世纪》：“或传以为仙，或言寿三百岁。”

《图书集成》五四六：“中部县黄帝庙，在城东三里。旧在桥山之西，宋开宝中移建于此。元至正中，平章王九皋重修。明三岁，遣官大祭，役一州三县之人，以时修葺。”

《史记·封禅书》：“高祖……入关，问故秦时上帝祠何帝也？对曰：‘四帝，有白、青、黄、赤帝之祠。’高祖曰：‘吾闻天有五帝，而有四，何也？’莫知其说。于是高祖曰：‘吾知之矣。乃待我而具五也。’

乃立黑帝祠。”

《汉武故事》：“元封元年，帝北巡还，祭黄帝冢桥山。”

《史记·封禅书》：上（汉武帝）“北巡朔方，勒兵十余万，还祭黄帝冢桥山，释兵须如。”

三、陵 墓

甲、言在陕西者

《史记·五帝本纪》：“黄帝崩，葬桥山。”

《尔雅》：“山锐而高曰桥。”

《史记·集解》：“《皇览》曰：‘黄帝冢在上郡桥山。’”

《史记·索隐》：“地理志云：上郡阳周县桥山南有黄帝冢。”

《史记·正义》：“《括地志》云：黄帝陵在宁州罗川县东八十里子午山。”

《风土记》：“阳州所有黄帝陵，在子午山上。”

《路史·疏仡纪·黄帝》：“葬上郡阳周之桥山。”

《图书集成》五四八：“中部县有轩辕柏，在轩辕庙。考之杂记，乃黄帝手植物，围二丈四尺，高可凌霄。”

《图书集成》五四八：“中部县有挂甲柏，在轩辕庙。黄帝既灭蚩尤，归而挂甲其上，至今树皮每尺许有

排痕密布，彷彿钻甲状。柏液中出，似有断钉在内。老干细枝，痕迹皆一，为古今奇景。”

《图书集成》五四九：“中部县上古桥陵在城北山上。世传轩辕黄帝铸鼎成，乘龙升天，其臣取衣冠葬于此。”

《图书集成》五四二：“中部县龙首山，在城东十五里，即黄帝龙馭之首山。”

《图书集成》五四二：“中部县凤岭，在城西郭外，世传轩辕戮懈谷竹成律吕，凤鸣于此。”

《陕西通志·陵墓》二：“桥山在中部县东北二里。其山形如桥，沮水环之，即黄帝葬衣冠之所。”

《陕西新省志》云：“桥陵在城北二里桥山上。山形如桥，故名桥山。陵曰桥陵，沮水环之，黄帝葬衣冠之所。详前通志。”原案云：浙江程寿筠筱亭，前知中部县，以桥陵为圣迹，恐渐倾没，将桥陵八景一一摄影，装潢成册。

（一）古碑，中书“桥山龙馭”四大字，旁题“大明嘉靖丙申十月九日滇南唐某书”，八景之一。大殿左角圯，殿门额题“德隆邃古”四字。柏柯横斜殿瓦上，如鸾翥，如凤翔，如神虬，自天飞下，而藏其尾。

（二）大神龕，黄帝冕旒中坐，二侍者分立龕内。龕外四宰臣执笏立，二老二少。

（三）一碑露立群柏中，隶书“汉武仙室”四字。

(四) 柏侧一亭中竖大石碑，隶书“古轩辕黄帝桥陵”七字，题陕西巡抚毕沅谨书二十余字，左题“大清乾隆岁次丙申知中部县事董廷楷立石”十八字。碑左一小碑，亦书“桥山龙驭”四字。

(五) 两柏间一庑，中列碑无数，殆历代褒崇祭享时所立者。

(六) 居前一碑，背负巨石，石旁大柏一，碑题“轩辕庙四千年古柏”八字，旁题程君名銜。

(七) 群小柏中一巨柏，较前柏微小，题字同。

(八) 庑侧一巨柏，不甚高而浓阴郁郁，其上书“汉武帝征朔方还挂甲于此树”。隶书末题曰：“桥陵八景，载在志乘，恐日就湮没，爰逐景摄影，隶书刊石，以资保存。”此三十一字，盖程君所书也。

乙、言在河北者

《魏书·太宗纪》：神瑞二年六月“壬申，幸涿鹿登桥上，观温泉，使使者以太牢祠皇帝庙”。泰常七年九月“辛酉，幸桥山，遣使者祠黄帝”。

《魏书·世祖纪》：神䴥元年“八月，东幸广宁，临观温泉，以太牢祭黄帝。”

《畿辅志》：“轩辕陵在平谷县东北十五里渔子山下。”

丙、言在山东者

《一统志》：“轩辕寿陵在曲阜县东北二里。”

《广輿记》：“轩辕寿陵在山东兗州府曲阜县。”

丁、言在河南者

《历代陵寝备考》：“《外纪》：‘帝采首山之铜，铸三鼎于荆山之阳，鼎成崩焉。其臣左彻取衣冠几杖而庙祀之。’《一统志》：‘河南阌乡县南二十五里有铸鼎原。’按首山在今河南许州襄城县西五里。《史记》曰：‘天下名山有八，而三在夷狄，五在中国，皆黄帝尝游，首山其一焉。’”

《阌乡志》：“轩辕陵在县南十五里。”

《日下旧闻补遗》：“轩辕陵在桥山，载记所同。然桥山非一，上郡妫州皆有之……郭景纯注《山经》云：‘帝王冢墓，皆有定处，而《山经》往往复见，盖圣人久于其位，仁化广及，至于殂亡，四海无思不衰，故绝域殊俗之人，闻天子崩，各自立位而祭，起土为冢，是以所在有焉。’景纯之论，可谓善言古者矣。”

四、后人赞颂

黄 帝 赞

曹 植

少典之子，神明圣咨。

土德承火，赤帝是灭。

服牛乘马，衣裳是制。

氏云名官，功冠五列。

黄 帝 赞 曹 毗

轩辕应元期，功能总百神。
体炼百灵妙，气含云露津。
掺石曾城岫，铸鼎荆山滨。
豁焉天扉辟，飘然跨腾鳞。
仪饗洒长风，褰裳蹑紫宸。

黄 帝 赞 华 虞

黄帝在位，实号轩辕。
车以行陆，舟以济川。
弧矢之利，弭难消患。
垂衣而治，万国乂安。

黄帝见广成子画赞 庾 信

治身紫府，问政青邱。
龙胡鼎波，丹灶珠流。
疏云如雨，落水先秋。
至道须极，长生可求。

——上见《历代陵寝备考》

子 午 岭 刘 倬

南北亘长岭，纵横列万山。

桥陵今古在，驰道有无间。
地拆庆延迥，源分漆沮潺。
秦皇开凿后，塞上几人还。

——上见《陕西通志·艺文》》十二

桥山陵古柏赋 刘尔悻

维上郡之列域兮，山崱岵以多奇。耸子午以衍灵兮，历双钟而分支。合三川以右濞兮，凤凰高峙于西陂。揖衙岭而忽止兮，诸峰环卫而共之。王气郁郁万年兮，相传轩帝衣冠藏于斯。周穆馭八骏登太行兮，越汉武祈仙而立祠。

乃筑台榭，爰作宫宅。周亿丈之城，植千种之柏，山丰土厚，祥萃地脉。时有云气以布濩，挹朔风而沾雨露之泽。闰魏晋与五代，奄唐宋以为晨夕。经岁历祀，瑞霭氤氲。高者参天，低亦拂云。干亭亭以直上，枝丝丝而旋纹。叶丛蔚而攒秀，气苾苾兮吐芬。

非烟非雾，亦青亦苍。黛横半岭，绿堆高岗。萑苇疑凝素于千顷，藻蘋似涵碧于汪洋。经回风而翻黯，色屡变而复黄。俯圣人之幽宫，翳森排于鼎湖之旁。傲四时而常贞，曾不畏雪霰与冰霜。

当夫青阳布令，勾芒鞭春。木欣欣以就荣，草芊芊兮向新。旭日始旦，士女缤纷。骚人墨客，公子王孙。携酒榼以登高，或藉草以作茵。踏树影之参差，灼百寻之龙鳞。醉飘飘而若仙，拾翠色以修真。

既而溽暑炎蒸，火云四吐，山川惔惔，热欲焦土。厚阴叠覆，如坐广宇。凉飈生寒，恍闻风雨。夜既沉而淹留，划长啸而起舞。

若夫梧桐惊落于一叶，霜林点缀夫秋容。桂影婆娑，皓魄当空。周匝密布，四望皆同。山高月小，滚滚水中。练曳龙首之口，珠耀水晶之宫。问天柱之远近，信广寒之可通。

至若北风霈发，彤云欲雪，天地一抹，人迹断绝。枯枝秃干，六花凝结。如虎豹蹲，如冰柱折。尔乃扫雪石，和玉屑，流脂可煮，爽气堪挈。俨问道于崆峒，叩广成以秘诀。

乱日昆仑，西来奠桥陵兮；二流环合，漆沮澄兮轩皇之藏风气凝兮。龙髯莫攀，邈独留此佳城兮；翠柏烟含，时有仙人飞腾兮。青青者叶，应圣人生兮；天开有道，翊我皇清兮。和气嘉祥，色葱葱其滋荣兮；万国享王，销戈兵兮。卜年卜世，如松柏之茂，无不尔或承兮。

桥 山 李梦阳

黄帝骑龙事杳茫，桥山未必葬冠裳。
内经泄秘无天地，律吕通神有凤凰。
创见文明归制度，要知垂拱变洪荒。
汉皇巡视西游日，万有八千空路长。

桥 山 杨 兆

桥山之上轩辕，寂寞松楸剑履存。
高冢旧余天子气，诸峰还让丈人尊。
青山雉尾当时事，白月龙髯何处屯。
犹似垂裳望仙侣，千官扈从隔昆仑。

桥 山 王 正

轩辕何事厌尘寰，自昔乘龙去未还。
万国有臣空恋慕，九重无路许追攀。
争知仙驾游何处，犹说衣冠葬此山。
终古风云劳拥护，神光尝射斗牛间。

桥山祈仙台 张三丰

披云履水谒桥陵，翠柏烟含玉露轻。
袞冕霞飞天地老，文章星焕海山青。
巍巍凤阙迎仙岛，渺渺龙车驻帝城。
寂寞琼台遗汉武，一轮皓月古今明。

次三丰韵 胡 澐尚书

览景来登轩帝陵，羽衣风驾骨毛轻。
桥山彻顶高耸翠，沮水缠腰中部青。
万壑烟云笼玉冢，九天秋色映龙城。
道人看罢三丰句，醉里挥毫壁上明。

桥 山

叶映榴

大荒浮黄云，众山失故黛。
划然川原开，苍翠杂烟霭。
居人为予言，桥陵在其内。
下车拂征尘，屏息虔再拜。
古柏参青霄，树叶如偃盖。
黄帝未仙时，此树乃先在。
其余二千株，环陵而向背。
陵庙与树连，云气时暧暧。
沮水流其中，触石发清籁。
怀古有余情，瞻眺得大概。
当年神圣兴，制作史具载。
采铜首山巅，铸鼎荆山界。
鼎成龙下迎，其说近迂怪。
左彻不及从，抱弓致忠爱。
凿山葬衣冠，庙祀崇百代。
且战且学仙，汉武发深慨。
至今祈仙台，芳草尚晻蔼。
候神幸纵山，采药遍海外。
封禅何纷纷，徒为公孙卖。
予意帝至尊，不幸亦何害。
缅彼垂裳年，古今共嘉赖。
不死今有冢，此言良大快。
惟有柏长生，风雨勿能坏。

轩 轅 柏

刘尔怡

轅轩庙前挂甲柏，霜根铁节坚如石。
老干挺直五十围，枝叶密排三千尺。
功开浑沌先天地，造物合当存爱惜。
南接华岳通云气，风来呼吸连太白。（太白，山名）
飘渺三丰竟若何，此树到今尚矍铄。（三丰题诗壁上）
传记莫考栽植年，鸟飞兔走青漠漠。
孤高自是神工力，盘踞似得巨虚托。
我今再拜揖仙翁，茹叶掇英可飞空。
九天若见骑龙人，道我还丹更御风。

和张三丰

薛柱斗

衣冠葬处号桥陵，九转丹成四海轻。
古柏森森金杖合，林风飒飒玉璈清。
由来帝道通仙道，果是佳城即化城。
何日归田容一遇，执经桥畔向真明。

皇陵古柏

牛光斗

轩帝登天去，陵高耸柏林。
风声同鹤唳，日影带虚阴。
叶拂晴宵翠，根盘石窦深。
仙踪应在此，踏葛一相寻。

桥陵怀古 蓝 熏

渐远结绳治，肇开制作源。
经纶垂百代，皇古尊轩辕。
轩辕伟烈保安留，涿鹿山前破蚩尤。
武功一耀干戈戢，文教覃敷海宇柔。
銮舆西狩御西土，宫阙巍巍崇九五。
一自龙驭远归天，桥陵玉冢至今传。
望望桥陵今古在，为说乘龙近迂怪。
还将乌号托遗弓，何事汉人乃附会。

和张三丰 张凤翥

高顶巍然黄帝陵，衣冠寂寞墓烟轻。
桥山耸峻千年峙，沮水萦洄万载清。
乌号当时传盛事，龙髯此日见佳城。
祈仙台畔留仙句，今古惟余夜月明。

九日同杨退庵中丞公、张子吉孝廉、赵秋水、
刘敬公文学登晋废藩台阁有怀桥山沮水

荒郊秋色草萧萧，此日乡心倍寂寥。
落帽正愁华发短，登高且喜故人招。
晋王宫阙寒烟迥，秦国关河客路遥。
极目桥山沮水畔，好将归去伴渔樵。

和张三丰 张凤翥

古柏参天黄帝陵，苍烟缭绕晓风轻。
龙盘万代开王会，凤历千秋肇大清。
地葬衣冠留胜迹，天生山水卫佳城。
祈仙汉武今何在？炳炳日星昼夜明。

登 桥 山

高陟桥山上，关河万里长。
沮流声浩浩，相干色苍苍。
红日竿头进，青虚足下藏。
轩辕龙驭古，百代景冠裳。

谒轩辕庙 李 暄 邑侯

万里涉江汉，分符入河而。
黄帝衣冠地，其说至今迷。
有无神仙侣，层台自虚齐。
制作开万古，洪荒事有稽。
唐虞与三代，先天奠蒸黎。
六相佐鸿烈，礼乐赞百揆。
鼎成龙垂髯，荒忽不必泥。
圣人自穆穆，何劳青云梯。
闾宫肃万象，柏林郁惨凄。
一时君臣际，巍焕高难跻。

禹功后世赖，空尔告元圭。

和张三丰谒桥陵韵

城北山头黄帝陵，万峰环抱晚烟轻。
鼎湖不断乌号泪，龙髯空余古柏青。
绮殿依然留诗句，琼台何处觅霞城。
道人曾说亲相向，羽化云腾未易明。

（老君庵道人为三丰买瓜亲见题诗笔上）

登 桥 山

行随竹马入秦关，东望桥山霄汉间。
龙去九天扶日月，龙归玉冢覆河山。
仙台百尺堪登眺，古柏千寻足解颜。
我欲乘风凌帝阙，访寻仙侣不知还。

谒桥山黄帝庙 艾若兰

轩辕飞升不计年，桥山明月夜空悬。
瑶台寂寞生春草，玉冢荒凉笼暮烟。
人文代换江河逝，庙貌更新俎豆鲜。
述却衣冠无觅处，千秋得拜袞衣前。

桥 山 李 暄

人在先天混沌初，从中一辟道无余。
似闻风雨龙当下，想见洪濛气可嘘。

挂甲去来酣涿鹿，迎仙曾否幻蓬庐。
多年留得山头树，冉冉乘言气可徂。

又

乘龙天上事多奇，荒史由来未可訾。
黯淡千年松柏在，森阴一道鬼神为。
莫言铸鼎公孙幻，尚击迎仙脱屣思。
不是郊雍能见帝，于今安得奉明词。

桥山夜月 韩 规

皎皎中宵挂玉盘，万里碧天丛桂寒。
何当结屋最高处，漫挹清光俯翠峦。

桥 山 范 璐 宜君令

万物了鸿蒙，双函适子丑。
至人自神灵，创家如父母。
此事可不没，上天于何有。
六龙御帝符，控握终在手。
垂髯复谁命，而乃供奔走。
小臣岂愚惑，攀号徒某某。
蜕尽古今人，既葬必非寿。
莫言是衣冠，草木当速朽。
胡为峙华巅，得藉神仙口。

又

虬柏青铜姿，风敲四时响。
肃然恭敬生，首出群生上。
山以古则灵，道由天不往。
迎仙谁有台，云何失意想。
蚩尤闻有星，云何照苍莽。
挂甲树成翁，长揖呼老丈。

谒陵偶成

李如玉

奕奕桥山接太空，重重松柏起秋风。
不因神圣开天统，尧舜何由允执中。

谒轩辕帝陵

上党李维藩

桥山南下沮河过，古柏苍苍枕碧波。
华胥梦还冠服盛，赤龙飞去鼎炉多。
九天仙侣朝金阙，万代子孙响玉珂。
帝德不同天地老，佇看山海变桑禾。

次三丰元韵

秦川北斗有桥陵，沮水星环剑气轻。
日月光同文物盛，乾坤氛逐武戈清。
龙飞玉露寒苍柏，鼎铸金波满赤城。
可惜汉家雄略主，不将帝德望昆明。

谒轩辕陵庙 吴琳芳

弹拂衣冠谒帝茔，环山松柏尚青青。
德参上下无多剩，气奠关河万载宁。
残碣积苔词韵古，华廊挂甲木痕腥。
仰瞻汉武祈仙处，落日迢迢冷露零。

前 题 范 俊

鼎湖龙去已多年，长有风云护几筵。
万古衣冠藏落照，四山松柏绕苍烟。
功开天地鸿蒙后，道在唐虞揖让前。
当日攀髯臣子泪，惟余寒涧响流泉。

祀轩辕陵恭纪 钟 衡

乌号弓堕旧山川，盛代明禋肃豆筵。
何处衣冠留上古，此时垂拱想当年。
龙车渺渺迎仙夜，虬柏森森挂甲烟。
千载神光严对越，祥云缭绕帝宫前。

从祀和前韵 杨必名

玉殿环瀛玉带川，清卿主鬯荐嘉筵。
擒蚩勋峻符今代，告庙功成似昔年。
挂甲高临仙树月，乘龙遥拂宝城烟。
喜逢祀事勤王事，对越真同黼座前。

祀桥陵恭纪三章 长白世臣

盛朝崇祀典，奉敕谒桥陵。
庙貌常巍焕，神灵自式凭。
法垂尊帝制，仙驭想龙升。
俨若冠裳在，肃雍将祗承。

峰绕桥沮山水清，帝陵巍峻柏青青。
漫言当日龙升去，犹对冠裳荐血牲。

古柏森森不记春，陵宫犹自享明禋。
轩陵制起功尚在，常使余波惠子民。

道经桥陵恭谒赋得近体二首 武之亨 学使

帝昔骑龙去九天，攀髯翘首鼎湖边。
辟开草昧人间世，惆怅云乡亿万年。
石漱沮流清夜响，月临瑶阙翠微妍。
遗弓欲觅虚无里，山水高深总漠然。

辘轳载牵马骎骎，邦手天颜异代心。
象物图形如魅伏，撑风留雨听龙吟。
川原未觉洪荒邈，草木凭销岁月沉。
肃肃霜草经远道，云踪去住未堪寻。

桥山夜月 丁 瀚 邑侯

雨洗山偏净，风吹月未阑。
光分千里碧，影落一池寒。
祇向云中觅，谁从水底看。
高崖非采石，醉后捉为难。

——上见《中部县志》

登黄帝陵绝句 邱逢甲

□□□□□□□，□□□□□□□。

袖中一卷英雄传，落日来登黄帝陵。

按：邱字仙根，台湾人，为台湾独立时领袖之一。甲午后内渡，寄居粤之镇平。其游陕谒陵，约在清光绪年间。前诗载邱集《岭云海日楼诗钞》。 于右任

桥陵在中部县，为黄帝衣冠塚，洛水萦回至山下，山西峙而东向，环山小柏无数，苍翠深郁，数十里外望见之。陵碑曰“古轩辕黄帝桥陵”。有碑亭，刻石曰“桥山龙馭”。有庙，庙中有黄帝象。余于民国七年与王子元谒陵遇雨，有诗录（左）：

皇祖威灵我欲攀，西征间道礼桥山。
弥天风雨伤今日，垂老仓皇过此间。

独创文明开草昧，高悬日月识天颜。

干霄古柏摩挲遍，挂甲何人亦等闲。

庙前有挂甲柏，土人相传为汉武帝挂甲所致，故当日此句系依为汉武帝挂甲而作。今按《图书集成》以为黄帝挂甲，姑依旧作未改。

右任附记

祭黄帝桥陵

（明洪武四年——《陕西通志·艺文》十一）

皇帝谨遣中书管勾甘，敢昭告于黄帝轩辕氏：朕生后世，为民于莫野之间。当有元失驭，天下纷纭，乃乘群雄大乱之秋，集众用武，荷皇天后土眷祐，遂平暴乱，以有天下，主宰庶民，今已四年矣。君生上古，继天立极，作蒸民主，神功圣德，垂法至今。朕兴百神之祀，考君陵墓于此，然相去年岁极远，观经典所载，虽切慕于心，奈禀生之愚，时有古今，民俗亦异。仰惟圣神，万世所法，将遣官奠祀修圣。圣灵不昧，其鉴纳焉。

祭告桥陵文

（清顺治八年四月初七日——《陕西通志·艺文》一）

自古帝王受天明命，继道统而新治统。圣贤代起，先后一揆。功德载籍，炳若日星。明禋大典，亟宜肇隆。敬遣专官，代将牲帛，其鉴享。

祭 告 文

（清康熙元年——《中部县志》）

帝王继天立极，功德并隆，治统道统，昭垂奕世。朕受天眷命，绍缵丕基，庶政方亲，前徽是景。明禋大典，亟宜肇修。敬遣专官，代将牲帛，爰昭启荐之忱，聿备钦崇之礼。伏维恪歆，尚其鉴享。

祭告桥陵文

（清康熙二十七年十二月——《陕西通志·艺文》一）

自古帝王受天明命，御历膺图。时代虽殊，而继治同道，先后一揆。朕承眷佑，临制万方，稽古礼文，肃修祀事。兹以皇祖妣孝庄仁宣诚宪恭懿翊天启圣文皇后神主升祔太庙，礼成，特遣专官，代将牲帛，虔修禋祀之典，用抒景行之忧。仰冀明灵，兹鉴诚悃。

祭桥陵文

（清康熙四十二年五月——《陕西通志艺文》一）

自古帝王，继天立极，出震承乾，莫不道洽寰区，仁周遐迩。朕钦承丕绪，抚馭兆民，思致时雍常殷，惕励历兹，四十余载。今岁适届五旬，宵旰兢兢，无敢暇逸。渐致民生康阜，世运升平。顷因黄淮告成，亲行巡历，再授方略，善后是期。睹民志之欢欣，滋朕心之轸恤，遄回銮驭，大沛恩膏，用遣专官，敬修祀典，冀默

贊邳隆之治，益弘仁寿之休。尚鉴精忱，俯垂昭格。

祭 告 文

（清雍正元年——《中部县志》）

自古帝王继天出治，建极绥猷，莫不泽被生民，仁周宇内。惟我皇考峻德鸿勋，媲美千古，显谟承烈，垂裕后昆。朕以渺躬纘膺大宝，当兹嗣位之始，宜修享祀之仪。特遣专官，虔申昭告，惟冀时和岁稔，物阜民安，淳风偏洽乎寰区，厚德常敷于率土。尚其歆格，鉴此精诚。

祭 告 文

（清乾隆四十五年——《中部县志》）

惟帝体元赞化，建极绥猷，泽被生民，勋垂奕世。简编明备，累朝之治法相传；弓剑留藏，千载之英灵如在。兹以朕七旬展庆，九有腾欢，懋举崇仪，特申昭告，缅当日之历图受箴，每深景仰之忱，抚此时之集嘏凝禧，弥切祇寅之念，冀佑邳隆之运，永贻仁寿之庥。式荐精禋，惟祈鉴格。

祭 告 文

（清嘉庆五年——《中部县志》）

自古帝王受箴膺图，乘时御宇，罔不究天立极，宥密单心。故能泽洽万方，德昭百世。朕承鸿典，景仰前

徽。兹以嘉庆四年十一月二十六日恭奉高宗法天隆运、至诚先学、体元立极、敷文奋武、孝慈神圣、纯皇帝主配享圜邱，礼成，特遣专官虔申昭祀，惟冀孚佑嶷熙之运，益昭安阜之风。鉴此精格，尚其歆格。

黄帝庙碑序

李 昉

（《陕西通志·艺文》九）

天下暴乱，圣人用干戈而靖之；天下宁静，圣人用道德而化之。昔有蚩尤肆残毒，孰能去焉？涿鹿有氛侵，孰能平焉？黄帝所以镇神威而大定也。云官纪符瑞，孰能享焉？土德成运数，孰能兴焉？黄帝所以神明德而致太平也。披史册览五帝之旧纪，阅经籍稽百王之大典；以治世之法为师范，以严祀之礼立教化；大宋阐统之十有三祀，开宝纪号之五载；彝伦攸叙，万国咸宁；西踰邛夔之乡，东极神枢之地，北穷绝塞，南极丹崖，靡不沐皇风而被德教。万里之斥堠无虞，四方之风雨咸若；文武并用，农战交修；师旅无六月之征，仓庾备九年之蓄；途歌里唱，远颂近谣矣。惟我皇帝陛下，握乾符，受天命，为亿兆之主，居九重之尊；静则端拱凝旒，来八方之琛赆；动则灵旗萃輅，荡六合之妖孽；圜丘展礼，天地享其至诚；万物效灵，人神协其佳瑞；所谓登三皇而迈五帝也。一日御便殿，顾谓辅臣曰：“前代帝王有功德昭著，泽及生民者，宜加崇奉，岂可庙貌堕而享祀寂寞乎？”当命有司遍加兴葺。辅臣承

命，拜称万岁。即日颁旨，洋洋德音，无翼而飞域中矣。今坊州黄帝即其一也。本郡守土臣，以厥功告毕，列状求文，诏以掌纶之臣坊，俾文之以琬琰，用纪其修建之迹。臣坊谨摭旧史而颺言曰：“昔者炎帝道衰，诸侯未制，惟力是特，伊民何依。黄帝于是神聪明之德，振威武之气。雕虎一啸，猛暴不觉震惊；神龙未起，陆梁先知悚惧。始以兵法治其乱，次以帝道柔其心，寰海尘飞，一朝尽息，修德振旅，劝农务穡。登沅湘而逐薰鬻，无远不验；举风后而用力牧，惟贤是试。少昊颙颙嗣其瑞云之德而宇宙清，唐虞尧舜法其垂衣之道而域中化。天生斯民，树之司牧。为司牧者，能以皇帝修身理国之道，以御今之世，而生灵不登仁寿之域者，未之有也。天有历数，鍾我皇朝；考求参订，徵祀事于前文；芷藻蘋蘩，荐时羞于广殿。羽卫似巡于东海，神兵如战于阪泉。尚凭德于威灵，永垂休于黎献。虔遵睿旨，谨序。

重修轩辕黄帝庙募缘序

刘尔懌

万物果无始乎？天生人何为也！万物能忘其始乎？人祀圣人何为也！圣人群祀于人乎？首出御世皆圣人也！惟创始者尊于世，三皇以及羲轩皆有功于天地之始也。唯定制度者切于民，予于是知黄帝之功在万世，为凡有血气者之永思不忘也。昔者穴居野处，帝始作宫室。昔者污樽杯饮，帝始制器用。昔者结绳而治，帝始有书契文

字。而且命大挠作甲子，伶伦造律吕。兴衣裳之制，习干戈之用，利赖至今者，固其功也。夫功者切乎民者也。民享其功，思其所从来，而庙者兴矣。中部有黄帝庙，盖黄帝葬桥山，因其地而祠之，礼也。创于汉，至宋而益饬，历元明迄今，岁春秋有司黜陟严祀事。三岁则天子命官匭帛载御祝持节来，太守先期役一州三邑之人，撤朽剝蚀，植欹筑颓。工告成功，然后太守率鄜刺史及洛中宜三令，届时而斋宿焉。而天子践位初，则又特遣大臣祭以告始，以故庙制视古来帝王庙独宏敞，且实枚焉。顺治辛卯，先帝亲政，宗伯王公觉斯以帝命肇祀于庙，今十有七年矣。岁久祀缺，庙遂颓败。迨抚都御史贾公惻然弗自宁也，以檄河西副宪，副宪鲍公亲诣庙谒览焉。而叹曰：“事孰有急于此者乎？乃兹颓焉弗修也！”于是下令庀材程工。太守王公则曰：“是不可重劳民。”乃捐俸资之。而司李刘公谓予曰：“事集于人，功成于众，子何言之？”予曰：“功崇者世，泽永者思。今孰不居尔宫室，利尔器用，习尔文书，而律历而衣裳，此世者之道。而思之永者也，则谁不思饬厥祠！”矧是役也，宪司身其事，太守与公尝董率之。夫上所令下奉唯谨也，上所为下弗力恤也。彼文武将吏，有事于延之封域者，原集其资以襄厥事，亦义所不得辞也。诗曰：“敬恭明神。”按祀典废厥祠祝不举者不敬，不敬者削以地。《礼》：诸侯祀封内山川，及古帝王。陕以西，岳曰华，镇曰吴，古帝王自周文武以下，祀各以其地。黄

帝之祀，惟上郡封内，则属兹庶执事，可不敬成事欤？且人未有不念其所自始者。考氏族谱世系，多出自黄帝。肃尔宫庙，又人本乎祖之义也。倘人不力爱、众弗赞、吝群相与以有成，则不惟有以仰副诸公敬共明神之意，而他日者，天子修废典，举三岁大祭秩宗来，将禋事仰瞻阙沛，不且大有光于朝廷哉！惟庶执事勉之！”

附

黄 帝 本 纪

——自《史记·五帝本纪》中录出

黄帝者，少典之子，姓公孙，名曰轩辕。生而神灵，弱而能言，幼而徇齐，长而敦敏，成而聪明。

轩辕之时，神农氏世衰。诸侯相侵伐，暴虐百姓，而神农氏弗能征。于是轩辕乃习用干戈，以征不享，诸侯咸来宾从。而蚩尤最为暴，莫能伐。炎帝欲侵陵诸侯，诸侯咸归轩辕。轩辕乃修德振兵，治五气，艺五种，抚万民，度四方，教熊黑貔貅羆虎，以与炎帝战于阪泉之野。三战然后得其志。蚩尤作乱，不用帝命，于是黄帝乃征师诸侯，与蚩尤战于涿鹿之野，遂擒杀蚩尤。而诸侯咸尊轩辕为天子，代神农氏，是为黄帝。

天下有不顺者，黄帝从而征之，平者去之。披山通道，未尝宁居。东至于海，登丸山；西至于空桐，登鸡头；南至于江，登熊湘；北逐荤粥，合符釜山，而邑于涿鹿之阿。迁徙往来无常处，以师兵为营卫。

官名皆以云命，为云师。置左右大监，监于万国。万国和，而鬼神山川封禅与为多焉。获宝鼎，迎日推策。举风后、力牧、常先、大鸿以治民。顺天地之纪，幽明之占，死生之说，存亡之难。时播百谷草木，淳化鸟兽虫蛾，旁罗日月星辰，水波土石金玉，劳勩心力耳目，节用水火材物。有土德之瑞，故号黄帝。

黄帝二十五子，其得姓者十四人。黄帝居轩辕之丘，而娶于西陵之女，是为嫫祖。嫫祖为黄帝正妃，生二子，其后皆有天下。其一曰玄囂，是为青阳，青阳降居江水；其二曰昌意，降居若水。昌意娶蜀山氏女，曰昌仆，生高阳，高阳有圣德焉。黄帝崩，葬桥山。其孙昌意之子高阳立，是为帝颡顼也。

中部县八景

——录自《图书集成》五四二

桥山夜月

桥山高耸，古柏密布。山藤夜月，映之如符。藻涵水中，幽景奇绝。

沮水秋风

沮水多佳木，秋风至，红叶刀刀，下浮水面。念伊人者，有在水一方之思。

龙湾晓雾

龙首传为轩辕龙馭之首山，晨必吐雾，瑞色射人目。

凤岭春烟

凤凰山逼邑城，烟浮其上，霏霏缭绕，久而不散。

南峪黄花

黄花峪，有滴珠泉，水滴下皆如花。

北桥净雪

北桥有石，大雪霏霏，石上如帚扫弗凝。

汉武仙台

祈仙台，汉武所筑。登其上，诸山咸拱，秃柏环立，凛凛不可久留。

桥陵古柏

柏多轩辕手植，老干凌霄，似虬龙盘空中，鳞甲走动，风雨更奇。

说 明

我们繁荣昌盛的伟大祖国，现已雄立于世界之林。千万爱国仁人志士、海内外同胞，来拜谒黄陵和观光者络绎不绝，都以自己是黄帝子孙而感到无尚光荣，都希望得到有关黄帝的史料，对先祖有一个较全面的了解。适有于右任先生的《黄帝功德纪》一书，将史籍及传说中有关资料采撷整理，列为黄帝之家世、黄帝与中华民族、黄帝与中国文化、黄帝之政绩、黄帝仙化与陵墓，以及黄帝本纪等专题，可供读者参考。其中一些内容不尽确切，需要加以分析，如黄帝仙化等神话传说，请读者注意。

本书编写于解放以前，错误较多。这次排印，仅据中国古印书局本与监察院排印本互校，择善而从。由于时间仓促，错漏未能详细改正，恳乞读者原谅，并望读者引用时核对原著。

黄陵县政协 宋兆杰 高增安

一九八六年十月

黄帝功德纪

于 右 任

陕西人民出版社出版发行

(西安北大街31号)

新华书店经销 西安新华印刷厂印刷

850×1168 毫米 32 开本 3 印张 43 千字

1987 年 3 月第 1 版 1987 年 3 月第 1 次印刷

印数：1—30,000

ISBN7—224—00016—7/K·4

统一书号：11094·221 定价：0.78元

封面设计 姚正选

ISBN 7-224-00016-7/K·4
统一书号: 11094·221 定价: 0.78 元